

BOSTON MEDICAL LIBRARY
in the Francis A. Countway
Library of Medicine ~ Boston

**Kurze aber vast eigent
liche/mögliche vnd in pflegung der gesund-
heyt norwendige beschreibung/der natur/eigenschafft/
Krafft / Tugent / Wirkung / rechten Bereytung
vnd gebrauch/inn speys vnd dranc / aller deren stück so
vns zu zeytlicher vnd leyblicher erhaltung/ Speys vnd
drancs von nöten/ vnd bey vns Teutschen inn
teglichem Gebrauch sind/etc.**

**Zu merer behendigkeit nach ord-
nung des Latiniſchen Alphabets
geſtellet/etc.**

Beschrieben durch D. Guualterum H.
Ryff **Riuum Medicum & Chirurgum.**

**Gedruckt zu Wyrzburg durch Johan
Myller. Mit Key: May: Priuilegio.**

Anno
M. D. XLIX.

1. Mg. 11.

Kurze aber vast eigentliche/ Nützliche vnd
inn pflegung der gesundheyt / notwendige beschreibung
der Natur/ Eysgenschaft/ Krafft/ Tugent/ Wirkung/
rechten bereitung vnd gebrauch/ inn speiß vnd dranc/
aller deren stück so vns zu zeytlicher vnnnd leiblicher er-
haltung/ speiß vnd drancs von nöten/ vnd bey vns
Teutschen inn teglichem gebrauch sind etc. Zu me-
rer behendigteyt nach ordnung des Latini-
schen Alphabets gestellet / etc.



A Cetum Das ist Eßig/ welcher die alten geler-
ten Medicus nicht wenig irrig vnnnd zweyfel-
hafftig gemacht hat/ dann etlichen vermein-
te er wer warmer natur/ dieweyl er extenuiert
oder erdünnert/ andre aber setzten in kalter natur/ dann
so man in niesset/ befindet man eigentliche das er kület/
Das er aber auch kalter natur sey/ söllig im ersten grad
vnd trucken im dritten/ zeigt an sein Tugent in dem fall
das er krefftig ist/ vnd nützlich gebraucht wird fur solche
Gifft/ welche das geblüt machen gerunnen oder zusamē
lauffen als das hart gedert Wagsamen safft Opium ge-
nant vnd der gleichen.

So zerzeylet auch der Eßig das gerunnen Blut im
Wagen/ vnd erdünnert oder extenuirt die zehen groben
dicken schleim. Lindert den schmerzen der Zän/ der von
hitz oder hitzigen flüssen verursacht wird / den Wunde
darmit geschwanckt. Leschet auch alle hitz vnd entzün-
dung mit frischem Brun wasser vermischet vnd einge-
truncke ist in diesem fall der Polnischen sew oder truncke
holz sonderliche Arzney/ des morgens also getruncken/
wa sie sich des vordrigen tags mit Wein oder Bier inner

halb zu hefftig erhitigt habē / solcher tranck leſchet auch den durſt hefftig / vnd ſtillet allen blutfluß. So man auch den biß oder ſchedigung eins wütten den od raſendē hundes / zum offeren mal mit Eſſig waſchet zeucht das gifft herauß vnd heilet in / vnd ſind aber dieſe geringe mittel vnd hilff / die wir volgendts in dieſem vnd andern ſtücken anzeigen wollen / von fleißigen vnd fürſichtigen Haußhaltern / furnemlichen denē / welche in Warcten / ſchlöſſeren dörffern vñ feldt ſitzen / od wonung ſich erhalten / welchen wir furnemlichen diſes Corpus der Medicin zu nuz vnd troſt geſtellet haben etc. faſt wol war zunemen / dan etwan in der not auch ein vaſt gering ſtuck / ſolcher einfachen Arzney höchſte hilff beweiset / vñ etwan groſſer Doctoren vaſt krum vñ verwirret geſchriebne Recept briefflein weid vbetrifft / etc.

Der Eſſig iſt auch vaſt gut / dennen welchen die gilb oder gallen inn die Augen geſchlagen / vñ das weiſſe des Augapffels ganz gelb farb wordē iſt / im Bad den dāpff in die Augen entpfangen / vnd zum offeren mall daran gerochen / etc.

Welche hitziger Complexion ſind / vñ Choleriſcher natur / vil galben bey ſich habē / den iſt der Eſſig geſund in iren ſpeiſen. Aber er iſt den Nerven vnd weiſſem geäder vaſt ſchedlich / dann dieweyl ſie des geblüts manglen vñ zart ſind / dringt er ſchnel vnd leichtlich hinein / vnrad darinn zu erwecken.

Wiewol er auch den ſelbigen ſchedlichen vñ zu wider iſt / die Melancholiſcher vnd Falter Complexion / oder natur ſind / vnd allen denen ſo mit Podagram Zyperle vñ geſücht der glyder behafft / etc.

Der Eſſig leſchet auch / vnd demet die vnkeuſchheyt / vñ ſo man ſein zimlich braucht / macht er den Leyb dürr vnd mager / etc.

Es ſollen

Es sollen auch vorab alle die so kalter vnd truckner Complexion sind / den Essig als iren besondern schedlichen feind fliehen vñ vermeiden / desgleiche auch alle dieselbigen welche ein schwache vnd blöde brust haben / vnd etwas fels oder mangel an der Lungen / vñ alle die welche schwach vnd blöd von gliedern / Nerven vnd saimē.

Wa es aber sach wer / das man in solchem fall den essig brauchen wolt / sol man die speyß / darin man solchers Essig vndermischet / abbereitten mit Honig zucker oder gewürz / darmit die krafft vnd scherpfte des Essigs gedenet werde. Der Essig ist auch dem gesicht vast schadt.

So man sich bey dem feuer hart verbrand hat / vnd Essig darauff gesprengt / leschet den brandt. Der Essig reizet zu der speyß / vñ erwecket den verlornen Appetit / vnd lust zu essen. So man auch leinen Tüchlein oder wullen in Essig netzet / vnd vber frische wunden leget / leschet alle hitz vnd entzündung darinn. Den dampff des warmen Essigs in die Ohren empfangen / benimpt dz singen vñ sausen der Ohren / vnd bringet widerumb das verlorn gehörd / vnd leschet die hitz vnd miltet die hitzige geschwulst der Bren. Mit Rosen öl Essig vermischet stilltet das wüttend hitzig Haupt wee / die schläff vnd nasen löcher darmit wol berieben / vnnd angestrichen oder mit leinen Tüchlin / vnd Schwammen vber gebunden / Der Essig soll auch den durst der Wassersüchtigen stillē vnd miltieren der von hitz verursacht wirdt.

Allium Knobloch / Wie starck vbel vñ vnfreundlich 8 Knobloch stinckt / so verschmehen wir Teutsche / doch in nit in vnseren Küchen / ist hitzig vnnd truckner natur / auff den halben teyl des vierdten grades. Ist groben leuthē die vil zehs dick's grobs schleims / vñ vngedenker feuchten bey sich versamlet haben / ein nützliche beque

me hilff/dann er lediget ab vnd erdünnert die selbigen/
doch rohe gessen ist er ein vast vngesunde kost/gibt auch
ein schedlich böse feuchte/aber gekocht wird im solch sched
lichheyt benomen/ der vrsach halb pflegen vnser Teut
schen den Knobloch in Hammels Feul einzugraben vñ
also damit zu braten. Solcher Knobloch ist denen wel
che kalter natur od Complexion/ sind nit schedlich/sond
nig vnd gut/aber denen so hitziger Complexion oder tē
perament vast schedlich/daraus wol zu mercken wie not
wendig einem jeden Menschen zu wissen/seine eygne na
tur Complexion oder temperament / wie wir droben ge
nugsam berichte gesezt haben / auch inn geringem vnd
vast nach gebigen speisen/wa man der gesundheyt ver
schonen vnd mit fleiß pflegen will/etc.

Vorab ist der Knobloch dem Gesicht/Haupt/lungen
vnd nieren schedlich / Aber er hat ein sonderliche eygen
schafft/das er den durst welcher entspringt/von versalze
ner feuchte leschet. Er treibt aus die würm vnd alles vn
gezifer aus dem Leyb / darum gibt man den Kindern
darab zu trincken/er zertheylet auch alle plehung im leib/
Vnd ob er wol wie gesagt / den gesunden Augen sched
lich/so dienet er doch den dunklen Augen von feuchte be
finstert vnd mach sie clar/etc.

Welche hitziger Complexion sind/den verdrucknet vñ
verdorret er den naturlichen samen/aber die kalter vnd
feuchter Complexion sind/die erwermet er vñnd bewegt
sie zu fleyschlicher begird.

Der Knobloch ist ein hoch berühmte argney vnd ed
ler bewerter Tiriack für vergiftet/vnd für vergifteter Thier
schedigung vñnd biß/ darumb er nicht vnbillich inn das
sprich wort geraten/Knobloch der Bauern Tiriack/wie
in dan der aller namhaftigst vnd hochberühmtest Me
dicus Galenus selber nennet. Dann die Schlangen vñnd
der

der gleichen Ungezyfer/ fliehen den Knobloch wie die
Raut/ Darumb die Persier gar nahe alle ire speyse mit
Knobloch bereitten/ gleich wie die groben Francken iren
Sens Prey. Man schreibt auch ein Historij von zweyen
welche beyde vergifft / der ein aber hat Knobloch gesse
vnd ist auffkömen/ aber derselbig welcher keinen Knob-
loch braucht hat/ sey gestorbe. Daraus gāg gewislichen
zu mutmassen/ das der Knobloch ein solche werme inn
sich hab/ der selbigen natürlichen werme inn vns etwas
gleichförmig/ darumb er denselbigen aufftreibt vnd er-
quicket / vnd die glider stercket vnd bekräftiget / solcher
gestalt das er von ihm hinweg treibt was sie beschedigē
vnd verlegen mag.

Der Knobloch zertheilet auch nit allein die windigen
plest vnnnd plehung / sonder lasset sich auch die selbigen
nit erheben oder versamlen / darumb er auch dz grim-
men vnd leybwee stillt/ vñ den hefftigen schmerzen des
hufft wees von flegmatischer feuchte/ vnd zehen schleim
verursacht / dann er solche schleim/ desgleichen auch die
narung/ welche den gliderē vberschickt wird / erdünnert
vnd extenuirt/ macht das geblüt auch reiner vñ subtiler/
gibt dem Angesicht ein schöne rote lebliche farb/ vnd rei-
nigt die keltören/ Knobloch zehen in warmer aschen ge-
braten/ vñ in die hohlen Zähne gesteckt/ drucknet die feuch-
te darinnen vnd benimpt den schmerzen. Aber den schwā-
geren vnd auch den seugenden Weibern/ ist der Knob-
loch schad / treibt auch den Weibern ire gebürliche rei-
nigung.

Agnus Ein Lamp / Das Lampfleysch ist zimlicher
werme/ vnd hat ein vberflüssige feuchte / darumb
den selbigen/ welche feuchter naturoꝝ Complexion sind/
das Lampfleysch nit gesundt ist/ befinden sich auch nit
voll

woll darvon / sonder es dienet allein denen die dürrer
oder druckner Complexion vnd Temperaments sind. Es
ist auch in sonderheyt zu mercken / ye jünger das Lamp-
fleisch ye schwerlicher es zu der dewungen / vnd ye feuch-
ter es ist / darüb auch herwiderumb die alten Lember / ye
alter vñ ferner sie d milch / ye leichtlicher dewüg sie sind /
vñ weniger feucht. Also solanch von allē andren schlacht
Wihe verstanden werden / nemlichen ye jünger vñ neher
sie d milch / ye zarter / keuscher vñ feuchter / jr fleysch ist ic.

A Migdala Mandelkern / Die Mandelkern kommen
vns vast mancherley gestalt fur in der speys / dan
diweyl sie vnfers Teutschen Erdbodens gewonet / sind
sie zu vast vilfaltiger nutzbarkeyt inn die Ruchen gera-
ten / sind warmer natur / geben zimliche narung vnd fü-
ren woll / ledigen ab vnd extenuiren / daruñ sie die brust
vnd vndersten bauch oder eingeweydt purgieren / wer-
den aber vast schwerlichen gedewet etc.

Die bitteren Mandel kern / sind hiziger dan die süssen /
vñ extenuiren oder ledigen nach scherpffer ab / dan von
wegen solcher erdünnenden oder extenuirenden / vnd ab-
ledigenden krafft zerteilen sie / führen auß vñnd nemen
hinweg alles was das milz vñnd die leber verstopffet /
vnd verhindert in iren gengen / brechen auch vnd zerma-
len den Stein / in Nieren vnd Blasen. Man sagt auch
vnd schreybt von den bitteren Mandlen / vnd haben es
vnser Teutsche trunckenpölg / zum teyl im brauch / wa-
man in nüchtere bitter Mandel kern ein gute hand voln
esse / dz man desselbigen tags nit mög trunckē werden ic.

A Mylon Krafftmel / Amidum oder stercke / wird be-
reyt vom aller saubersten / best zeitigsten / volkom-
mesten Weyzen / in hiziger zeyt der Hundes tag / fünff
mall

mall des tags mit frischem Wasser begossen / vnd dann also quellen vnd erweichen lassen / dan mit hülzen knüttlein inn starckem hülzen mörschlin wol zerstoßen / vnnnd nit / wie etliche vn sauber Haushalter pflegen / mit plosssen Schencklen / die etwan gar ein selzamen geroch vnd Rauch / vil wunderbarliche gestalt haben / etc. getretten / dann von den Kleyen abgesundert / vnnnd auff reynen weissen leinen Tücheren vber breite Syp boden gedeckt außgossen / vnd also in der Sünen trucknen lassen / das er nicht sawer werde. Es kület vnd trucknet / so man in inn der speyß braucht / als zu dem zarten Amidum Müßlein / mildert auch darmit alle reuhe / ist auch ein sonderliche / krefftige vnd höchste Arzney / inn dem Blutgang oder Rottenrur / dann er stopffet vnd heylet die Därn / etc.

A Nethum Dyllen / Das gemein grün Kraut von Dyllen / wird inn Koch kreutteren / vnnnd auch seins liplichen geruchs / andier gestalt gebraucht / wiewol der Samen nicht weniger breuchlicher / inn die Würst vnd auff die Ruttelfleck / vnd dergleichen. Ist warmer vnd truckner Natur im andren Grad / stillt die Plest vnnnd plehung / von hefftigen auffstreyben grober dicker feuchten / etliche loben den Dyllen als solt er dem Magen nütz vnd gut sein / das widersprechen andre / vnd ist dieses die versach / die selbigen welche inn dem Magen nütz vñ gut achten / die setzen auff seine werme / welche die feuchtheyt im Magen verzert / desgleichen betrachten sie auch dzertheylende krafft der windigen plest / die sich im Magen versamlet haben / Aber der gegen teyl betracht nit weytter / dann das solcher Dyllen vast schwerlicher derung vnd ein sonderliche krafft vnd eygenschafft habē / sol den

B

Magen

Wagen vnlustig zu machen / vnnnd zu vnwillen zu reyz-
zen. Weytter ist der Dyllen Samen vnd Kraut/
vil gebrauchlicher inn der Argney/dann in der Küchen/
als wir hernach genungsamlichen anzeigen werden/die
weyl wir in aber noch in vnseren Teutschen Küchen im
teglischen brauch haben/wer vnbillich in von seiner Lu-
cken zuuerstossen/etc.

A Nisum Anis Samen/ Der Anis samē ob er gleich
wol vil liplicher dan der Dyllen auch vnser Teut-
schen Ackers furnemlichen des speyrischen vnd strassbur-
gischen dermassen gewonet/ das er daselbst mit hauffen
wachset / hat er doch nit also vast inn die Küchen gewo-
net/ wird allein auff gebratten Dpfel / Quitten / Birn/
Torten vnd dergleichen wie ander Confect auff gestreit.
Ist warmer vnd truckner Complexion im dritten grad/
ist ein vast nützlich semlin/ möcht auch nützlich in aller-
hand speys gebraucht werden/fur veralter kalte gebrech-
en der Leber/schwerlich Athmen/ so von zeher flegma-
tischer feuchte verursacht wird/Dyspnæa genant/ von er-
fahren Medicis / Zerteylet die windigen Plest / vnd ver-
meret den Ammen vnnnd seugenden Weyberen die milch
hefftig/darumb dises Sämlein bey den Welschen Weib-
lein inn sonderlichem stetigen gebrauch/etc.

A Nser Ein Gans/ Wie auch Plinius bezeugt vor et-
lich tausent Jahren also inn Teutscher sprach ge-
nand/ ist ein schöner Brodt vogel / des man sich wol er-
gezen mag/ wiewol sein fleysch von den erfahren Medi-
cis in ein verdacht kommen/als solt es im Leyb vberflü-
ssige unreinigkeyt geben/vñ schwerlicher derung sein/
vnd ist wol war das Gens fleysch vil harter vnd gröber
dann aller andrer Gefögel fleysch / welche wir pflegen
in ges

in gemeiner Haufhaltung zam auff zu ziehen/ aber solchem fell vnd mangel pflegen wir Teutschen zu fur Kommen/das wir die Gens zimlich jung gebratten essen/Die Alten Medici loben die flügel an der Gans/vnd achtens fur das gesündest/ So ist auch das Gans schmalz nicht weniger inn der Arzney/dan inn der Ruchen gebrauchlich / dann so man warm Gens schmalz inn die Ohren tropfet/benimpt den schmerzen/ vnd so einem die Leffzen auff schründen/ sol er sie mit Gens schmalz bestreichen. Die Gemecht von dem Gansser gessen/ sollen vast fruchtbar machen / Aber die Zungen sol ein sonderliche eygenschafft haben / die harnwind oder tröpffling harnen zuuertreiben.

A Qua Wasser / Ob wir gleich wol günstiger Leser dieser zeyt/ ein sonderlich trefflich Werck fur hant haben / von Wasser vnd alles was dasselbig betreffen mag/ Als Wasser kunst / Wasser gebew / Schiffarten vnd der gleichen/ So wir willens sind/ zu ehren vnd wolgefallen dem Hochwürdigem Fürsten vñ Herrn Herren Melchior Bischoffen zu Wyrzburg/ vñ Herzogen zu Francken/Auffs fürderlichst zuuerfertigen etc. Erfordert doch dises orts vnser furgenomenē ordnung dieses new Corpus der Medicin ordenlichen zuuolfüren/ dz wir von trinck vnd Koch Wasser / auch ein sonderliches Capittel/ setzen vñ vnterschieden/die alten Medici vnd fleißige erkündiger der Natur des Wassers fünfferley/ Als regen Wasser/ Brunn Wasser/ siedt Wasser/ fließends Wasser vnd see Wasser/ Vnd ist das regen Wasser das aller leichtest/ vnd verwandelt sich bald/ mag nicht lang bleiben / ist denen nit gesund die Febricitiren/ vnd so vol Gallen sind/ deßgleichen denen so mit der gilb oder gelbsucht behafft/dann es dringet schnel hindurch vnd wird leichtlich inn gallen verwandelt.

So man es aber ein zeyt lang behaltet/dz es ein weyle
steher/so mag es dann nicht also schnell durchdringen/
erwecket aber vil flüsse/ in sonderheyt so man es kalt trin
cket. Aber das Brun Wasser/ inn sonderheyt welche
Quellen gegen mitternacht iren ausfluß haben/ vñ auß
starcken Felßen entspringen/ welche die Son nit beschein
nen mag/ die dringen langsam durch / sind nicht also ge
sund/ aber die selbigē welche von dem Sum̃erischen auff
gang/ vñ Winterischen nidergāg/ iren vrsprung haben/
gegen Mittag zu/ diese Wasser werden von etlichen für
nemen Medicis also gesunde/ gelobt vñnd vor andren
erwelet zum trinck vñnd Koch Wasser etc. Das sichte
wasser ist wol kalt vñ einmudig zu trincken/ gehet schwer
lich durch / hat vil jerdischer Materi darunter vntermi
schet/ ist derhalben den selbigen vast nütz vñnd bequem/
welche ein Hitzigen Magen haben / vñnd vast hitzig im
Leyb sind etc. Das fließende vñd stillstand See Wasser/
sind beyde schedlich/ dienen weder zu trinck noch zu Koch
Wasser / dann solches Wasser vast schwerlich durch ge
het/nicht leichtlichen gedewet wird/ vñd je mer man sein
trinckt/je mer man darauff durstet/Aber das stillstehent
Wasser ist am aller schedlichsten/dann es gar nahe halb
todt / von wegen der vnbeweglicheyt oder stetigem still
standts.

Weytter sind auch schedlich vñnd böß alle gesalgene
Wasser/vñd was ein frembde qualitet hat/es sey inn ge
schmack oder geroch/ deßgleichen die Wasser darin wür
me vñd andre vngezyfer wachsen / alle Berwerck Was
ser/so vber die Metall lauffen / deßgleichen alle Wasser
welche an denen orten quellen / da warme Bad findt.

Aber zu kurzem beschluß/sol man mercken/das ein ye
des Wasser langsam durch gehet / schwerlich gedewet
wird / plehung erwecket im leyb/ vñ vil fluß verursacht/
inn son

inn sonderheyt so man rohes Wasser vast kalt trincket. Wiewol die selbigen/welche hitziger Complexion vnnnd Temperaments sind/auch in etlichen hitzigen Franckheyt/en/dz Wasser etwan nüglich getruncken wird. Es wollen aber etliche erfarnе Medici/ das man nicht durch dz gewicht erlernen soll/welches das leichter oder geringer Wasser sey / sonder dem nach vnnnd es bald erwermet werde/vnd snel widerumb erkalte/vnd dardey sauber schön/rein / lauter vnd klar sey / dann welches Wasser nit diser art ist/achten wir nicht fur gesundt.

Schnee Wasser vnd Eys wasser/ sind die aller schädlichsten Wasser/die am aller vngesündigsten. Solches sey dieses orts von trinck wasser vñ Koch Wasser genung gesagt/dann wer hiernon vast weydeufftiger vnd nützlichen bericht begert zu wissen / mag obgemelt Wassers buch durch lesen etc.

A Sparagus Spargen / Die Spargen werden im frül링 bey vns Teutschen also hoch geachtet/ das sie auch auff der grossen Herrn Tisch raum vnnnd platz haben/vnd furwar nicht vnbillich/dañ wa es der rechten Samen Spargen sind / gangz mürb vnd an alle hölzige zacheren / geben solche Spargen mer narung vnd führen basß / dann kein ander Koch Kraut oder Garten Kraut/so man pflegt inn der speyß zu niessen/ Also das etliche erfarnе Medici die Substancz der Spargen irer mittlen Natur gesetzet haben/zwischen dem speyß vnnnd Koch kreutteren/von wegen seiner reichlichen fürung etc. Spargen treyben den Harn/ vnd eröffnen alle verstopffung der Nieren vnd Leber. Die Spargen gessen stillen auch das grimmen/ Leybwee/ vnd schmerzen / der Nieren vnd Lenden/ so von flegmatischem schleim ver vrsacht werden/Vermeren den Manlichen samen/vnd

werden vil schneller dann ander Koch Kreutter inn ge-
blüt verwandelt. Spargen gessen fordern auch den Wei-
bern ire gebürliche reynung / Stillet den zittern vnd be-
wen des Hergens / stercket die Zän / werden gemeiniglichẽ
mit guter fleysch brü gesoten / mit Essig / saltz vnd baum-
öl angemacht.

A Triplex Wylten / Ist ein grob Koch Kraut / mehr
dem Armen dann den Reichen kichen bekant / ist
kalter Natur im ersten Grad / vnd feucht im andren / lin-
dert den Bauch / zum sanfften stulgang vnd dienet fur-
nemlichen den selbigen inn der speys genossen / so mit der
gilb oder gelb sucht behafft sind / von hitz der lebern ver-
rsacht. Dieses Koch Kraut mag auch nützlichẽ
von denen genossen werden die hiziger Colerischer Com-
plexion sind / vnd vil Gallen bey sich haben / So man dis-
ses kraut mit Bappel blettern ze rstößet / vnd eusserlichen
vber legt / leschet die entzündung hiziger geschwulst etc.

A Vellanae Haselnuß / Werden bey vns Teutschen
grün vñnd dürr inn der speys gebraucht / auch zu
merer liplicheyt mit Zucker vberzogen / sind warmer vñ
feuchter Natur / geben mer narung vñ füren baß dann
die andern gemeinẽ Nuß / so man Welsch nuß oder wal-
nuß neñet / sind aber schwerlicher derung / erwecken plei-
hung / so mā sie schelet sollẽ sie leichtlicher gedewet werde.
Die dürren rotẽ römischen haselnuß / sind bey vns Teut-
schẽ in grossẽ beruff / die rote nur od hefftigen blutgang
zu stopfen / vñ ist solchs ein gewis Experiment vnd war-
hafftig erfare stück / derhalben wir dasselbig dem gemei-
nen man nit furhalten wollen / Dz solt du also bereitten /
Nim der Römischen rotten Haselnuß die wol dürr sind /
die magstu auff einem warmen Plech oder Ofen noch
baß

laß derren/dann so nim also schwer Bonen mel/vnnd
frischer feister muscaten nüs darzu yeder gleich vil/ stoß
alles zu sammen/als krefftig vnd wol als du immer ma
gest / dann formir Kügelein daruon auff ein halb Lot
schwer / vnnd wo es sich nit wolte ballen lassen vnnd zu
spröde were / so geuß ein tröpflein dick rotten Wein dar
ein/dann lege dein Kügelein rundt formirt/vnd inn der
mitten ein wenig zusammen gedruckt auff ein plechlein/
vnd laß ob einem sanfften Kolfewrlein zimlicher massen
backen/doch das sie nit verbrennen. Diese Kügelein be
halt zu der notturfft / dann mag man sie widerumb zu
Puluer stossen/vnd mit bequemer feuchte eingeben / als
wir ann andrem bequemen ort/weidleufftiger anzeigen
werden. Die rotten Römischen Haselnüs/ haben eben
als wol krafft / wider Vergift / vnnd den schedlichen
giftigen Pestilenzischen lufft / als die andren gemeinen
Nüs/mit Raut/Saltz vnd Feigen gessen.

A Pium Hortense Petersilien / Vnder allen Koch
krentteren ist der Petersilien/Kraut vnd wurzel/
inn vnsern Teutschen Küchen der gemeinst / also das nit
wol ein richt weis zu bereitten / darauff nit Petersilien
kom/darauf das sprichwort erwachsen/ an zweiffel auß
den worten Plinij. Petersilien auff allen Suppen/ Vnd
ist aber der Petersilien/ warmer oder hitziger natur/im
andren Grad/vnd trucken im dritten Grad / treibt den
Harm/inn der speiß/ kraut oder wurzel gebraucht/zer
teylet die windigen plect im leib/ist aber schwerlicher derw
ung/Dann wir Teutschen im brauch haben/solchen Pe
tersilien/furnemlich das Kraut/den meren teyl rohe zu
essen.

Welche zu der schweren Plag / der fallenden Suche
vnd frayslich geneigt sind/die sollen dz Petersilien kraut
inn

inn iren speisen vermeiden/dañ es wůrde inen trefflichen
schadē bringen/vñ zu solchen gebrechē mer anreizung ge
ben/dañ es sich befindē/dz etliche durch bequeme mittel/
von diser schweren Plag entledigt / aber hernach als sie
dieses krauts on vnderlaß gebraucht/darmit widerumb
behafft worden. Der Petersilien ist auch den gemechten
schedlich/stillet den heshen oder kluren/welcher von gro
ben zehen vberflüssigkeyten verursacht wird. Er reinigt
auch/kraut vnd wurzel inn der speiß gebraucht/die nie
ren blasen/vñ eroffnet die verstopffung aller innerlicher
geng. Die mit dem stein vnd sandt beladen sind/die sol
len kraut vnd wurzel inn allen iren speisen niessen/auch
inn dem kraut baden/dann solches zermalet/vñ bricht
den stein/fůrdert auch den harn inn disem fall/Aber die
Ammen vñnd seugenden Weiber/sollen den Petersilien
vermeiden/dann er verzeret vnd mindert die milch etc.

AVena Haber/ Den Tolpischen Schwaben/Algey
Aeren vnd Riesbauren / wóllen wir iren Haberen
samt dem Haber brey gern góñen / als ein grobe speiß
groben leuthen / kúlet vñnd stopffet / ist ein harte grobe
vnfreundliche Kost.

Basilicon Basilgen / Ob gleich wol dises edel wolriech
Bent Kreutlein/nit sonderlich inn der speiß gebraucht
wird/ so zihet man es doch inn allen wůrz garten/ seins
edlen lieplichen gerochs halben/welcher dz Haupt/Hirn
vnd Hertz erquicket/stercket vnd bekrefftigt. Dises Kreu
lein/so man es mit weisser Rosen wasser/oder mit fries
chem Brūnen wasser netzet / oder daran reucht/fordert
den schlaff/wird inn der speiß auch nůtzlich gebraucht etc.

Beta Mangolt oder Beten/ Der Saft dieses Koch-
krauts / sol den Bauch etwas lindren vnd zum stul-
gang senfftigen/ verlegt aber doch den Magen/ in son-
derheyt den selbigen/ welche vorhin ein blöden vast vnd
leicht empfindlichen Magen haben/ daruñ man dieses
Kochkraut billich/ nicht also hefftig im brauch haben solt/
als wir Teuschẽ gewonet sind/ dan die kraut müßlin dar-
von vast wenig/ wie auch andre Kochkreutter/ narung
geben/ vnd gang geringlichen füren. So man aber den
Mangolt oder Beden sendet/ das er in zimlicher weiche
wird/ dann guten scharpfen wein Essig darauff geussset
wie ein Compost / Solchs ist ein nützliche bequeme speiß/
denen welchen Leber vnd Niltz verstopffet sind / dann
solchs eröffnet alle verstopffung / darumb sol man auch
die Kraut müßlin von Beten nicht on Essig essen/ son-
der sauer machen/ als die Welchsẽ Manesterlin/ die wir
auch pflegen von dem Spinat zu bereitten. So man di-
sen Mangolt od Beten nützlich bereitten will/ darmit er
auch desto weniger schedlich / sol mā in auff drey od vier
mal/ mit siedende wasser brüen. Von der Mangolt wur-
zel schreibt mā/ wo die selbig gebrant/ mit Honig vermi-
schet / auff das Haupt gestrichen werde / das solchs die
Har so yzund ausfalle/ betreffrige vnd erhalte etc.

Bassica Kólkraut vnd Rappes/ Das Kólkraut vñ
Rappes / sind inn Teutschland inn gemeinen Kú-
chen/inn sonderheyt der Handwercks leuht/ vnd gemei-
nem Man/ die gröste lucken büßer/ vñ furnemen tegliche
kost/ den leeren hungerigen Magen zu ersettigen/ also dz
im Beyer land/ etwan eins tags/ bey drey oder vier ma-
len Rappes oder sauer Kraut furgetragen wird / gibet
ein vngefunde böse schedliche narung / vnnd gebiert ein
grob dick Melancholisch geblüt/ verderbet das Gesicht/
C bringt

bring im schlaff vil fantastischer treum für/dardurch die Nachtru turbiert vnd verhindert wird / vnd sol die brü vom Kólkraut / den Leib zum theyl sänfftigen / zum stulgang / aber so man die substanz des krauts neuisset / stopffet die selbigen.

Der Sommer Kól ist vngesünder dann der Wintter Kól / Der Kól treibt den Harn / vñ die Würm auß dem Leib / vñnd benimpt die Trunckenheyt. So man den Kól mit gutem feistem Hamel fleisch kochet / verleuert er den mererē teyl seiner schedlichheyt / Sonst mag auch der Kól inn teglicher Arzney / auch nützlich gebraucht werden / inn fleißiger / fürsichtiger / vnd sorgsamer Haushaltung / den Kól safft mit Hönig vermischet / bringt die verloren stim wider / vnd gesprech / daher auch die Apodecker jr hust Larweglin Loh de Caulibus machen / in der not sind auch die frischen Kól bletter krefftige wund pflaster / heilen wunden / külen die hüzigen scheden / geschwulst vñ enzündung etc.

BVbula caro Rindfleisch / Dz Rindfleisch gibt reichliche narung / füret woll / aber das geblüt / so darnon geboren wird / ist vast grob vnd dick / darumb das Rindfleisch den selbigen / die Melancholischer Complexion od temperaments sind / nit nutz oder gut ist / sonder bringet men mancherley Melancholischer krankheyten / Dz Rindfleisch wird auch schwerlich gedewet / vñ von sich geben / doch wo man es wol verderwen mag / füret es vast reichlich vnd wol / So man es aber gegen dem Hamel fleisch vergleicht / sol es kalter natur sein / vnd Melancholisch geblüt geben. Die Rindfleisch brülin oder süplin stopffen den fluß von Colerischer feuchten / oder scharpfen gallen verursacht. So man sich auch besorgt / das man das Rindfleisch nit derwen mög / so mag man es mancherley

mancherley gestalt bereitten/ das es leicht diewiger werde/ als mit Pfeffer vnd Wacholter/ inn gutem Wein essig erbeizet/ vnd andrer dergleichen vilfaltiger gestaltdet/ als dann die wol geubten Köchin wol wissen zu bereitten etc. Aber inn kürzer summa daruon zureden/ ist Kindt fleisch kein bequiem oder taugliche speiß den müßig genden/ sonder den selbigen/ welche solches durch vñbung vñ bearbeytung des leibs/ wissen zuuerdewen etc.

BVt irum Butter oder Schmalz/ Der Butter ist inn vnseren Teutschen Köchin also notwendig/ dz man on den selbigen nicht wol ein wasser Suppen zu richten möcht/ dann wir Teutschen den brauch haben/ das alle vnser kost in feistigkeit schwimmen muß/ daruñ wir zum teyl nicht vnbillich von den Welschen/ Graß Ale-
mant genant werden.

Vnd ist aber der Butter zimlicher werme/ gibt auch gute narung/ lindert die Brust/ vnd macht leichtlichen außwerffen/ inn sonderheyt nach Schweygerischer manier/ mit frischem Honig vermischet/ solcher gestalt benimmt er auch den kalten vnd durren husten/ So man aber sein zu vil braucht/ wird der Magen vnlustig daron/ ye älter oder ye fyrner der Butter wird/ ye hitziger er wird. Welche hitziger Complexion oder Temperaments sind/ denselbigen sind alle speisen/ die mit Butter vast feist gemacht sind/ vast schedlich vnd zu wider/ dan der Butter inn jnen vast leichtlichen in Cholerische feuchte/ oder gallen verwandelt wird etc.

Von gemeiner Haus Argney/ so man von frischer Butter/ so man auch ancker/ vnd schmalz nennet/ nach mancherley lands brauch/ hat der Butter ein erweichen de/ zerteylende/ vnd zeyttigende krafft/ wird derhalben zu anfang/ 8 aufflauffenden geschwer hinder den Ohren

so man die Ohr Klamm nennet/ Herodrüsen/ zwischen der
mecht vñ vñen teyl des schenckels/ vast nüglich gebrau-
chen etc.

Aber inn sonderheyt / hat der frisch May Butter die
Krafft/ das er den jungen Kinden/ die anfahren Zänn/
stossen den schmerzen des Zennens stiller/ vñnd die Zänn
furdert.

Borrogo Borragen / Welches auch etliche Burre-
trich nennen/ solte billich Corago heissen/ oder genant
werden/ von dem wortlin Cor so das Hertz bedeut/ das
dises Garten oder Koch Kraut/ ein sonderlich/ trefflich/
hoch nüglich kraut/ inn aller handt/ fell vñnd gebrechen
des hertzen / dasselbig zu stercken vñnd bekrefstigen/ dar-
umb man sein inn wol gerüsten Apodecken/ kein augen-
plick geraten mag/ Darumb auch die Koch Blümlin vñnd
Kraut von Borragen/ inn Salat vñnd Salsen/ Kraut
müßlin vñnd aller kost / da es füglich geschehen mag/ mit
einmischen soll/ leschet den durst/ dienet wider allerhand
gebrechen der Leber/ in sonderheyt/ im Salat gessen etc.

CAnabis Semen Hanff Samen / Es hat sich der
Hanff/ ob er gleich eins ganz vnfreundlichen bö-
sen geruchs / auch den bösen schalckhaftigen Knaben/
auffs höchst verhasset / nit erhalten mögen / das nit die
schleckmeuler den edlen wald vögelin zu leid/ welche vns
den traurigen Winter mit irem liplichen gesang/ milche-
ren/ inn versperten Vogel heuseren/ von disem Samen
erneret etc. Auch inn die Küchen gebracht haben/ mit
Wein oder Bier/ Hanff suppen daruon zu machen/ So
doch der Hanff samen / ein sonderliche art/ vñnd eigens-
schafft/ dem Haupt vñnd Hirn/ schedlich zu sein/ also das
auch

auch die alten erfarnen Medici yederman/vor dē Hanff
samen gewarnet haben/als ob der mensch möchte seiner
vernunft zerrüttet / vnnnd vn Sinnig werden/ So hat er
auch weiter die eigenschafft/ das er den naturlichen sa-
men verdorret etc.

C Apparis Rappres/ Dises gewechs ist der wachsung
halb/ noch in Teutsch land frembdt/ aber die einge-
salznen blumen/ vnd samen/ knöpff/ werden genugsam
zu vns geführt/ vnd allenthalben in der Kost gebraucht/
vom Salz gewessert / vnd mit Ol vnd Essig angema-
chet/ vnd zu andrer Kost/ sonderlich zum Gebraten ges-
sen/ wiewol etliche/ von disem Rappres Salat bereitten/
mit gebraten Vöglin umblegt.

Vnd ist aber der Rappres / warmer vnnnd truckner
Complexion/ im andren Grad/ vnd hat aber darbey ne-
ben mancherley widerwertiger qualitet / dann von we-
gen der bitterkeyt / reinigt vnd ledigt er ab/ von wegen
der scherpffe erhitzigt er/ zerteylet vnd extenuirt/ so hat er
auch ein reuhe/ von derselbigen wegen astringirt er etc.

Vnd ist aber dem milz der Rappres / vber die maß
nuz vnd gut/ zum offtermal zu der speiß gebraucht / inn
sonderheyt mit Essig/ oder mit dem sawren Essig Syrop
oxymel genant. Angemacht Rappres treybt auch den wei-
bern ire gebürliche reynigung/ sol aber der blasen vñ nie-
renschad sein/ die wurzel von Rappres/ wird allein in 8
Apotecken gebraucht/ vnd ist krefftiger / dienet innerlich
vnd enusserlich / fur verstopffung des Milz vnd der Le-
ber etc.

C Aprea caro Gempfen fleisch / Wiewol dises Wild-
predt/ in ebenen landen da nit hohe gebirg/ frembdt
vnd vn bekand / ist es doch inn den Landtschafften des
C 3 hohen

hohen Gebirgs vñ Felsen/vast gemein vnd wol bekant/
vnd wird vor andrem Wildpredt/fur das gesündest ge-
achtet/dañ es ein gut gefasst der narung vñ geblüt gibet/
vnd hat ein sonderliche gemeinschaft/ mit dem Mensch-
lichen leyb / dienet furnemlichen wol denselbigen/die feu-
chter natur vnd Complexion oder Temperaments sind/
vnd mit vilen vberflüssigen feuchten erfüllet/deßgleichen
den selbigen / welche mit grimmen vnd leibwee behafft/
vnd der schweren Plag/der fallendē Sucht/stopffet den
Bauch/ von wegen seiner truckne / bekompt es woll den
Nerven etc.

Cardama Kressen/Den man auch sonst Nasturtium
nenet/ist ein vast gemein Salat/ vñ Salsen kraut/
doch allein so er erst vom Samen auffgehet / noch zart
vnd jung ist/ Der Kress ist hitziger vnd truckner Natur/
ledigt ab allen zehen schleim/ vnd flegmatische feuchten/
Von dem Kressen schreibt man/wo er vil mals inn der
speiß gebraucht werde/das er das Haupt vnd hirn ster-
cke/vñ die vernunft stercke/reiget zu vnkeuschheyt. Der
Safft daruon vertreybt Jänwee/ In wolgerüsten Apo-
tecken/ist der Samen im brauch etc.

Carica Dür Feigen/Der auffgedorten Feygen/brin-
get man zweyerley art in Teutsch landt / alt grobe
schwarze feiste Feigen/vnd dise packt man ein in kysten
oder grosse korb / Vñnd weytter bringt man die kleinen
weißen Marslier Feygen/inn den kleinen Feygen korb-
lin eingepackt/ dise sind also rohe zu essen die liplichsten/
Die durren Feygen sind warmer Natur / vñnd so man
sie inn der speiß braucht/ sind sie der brust vast nutz vñnd
gut/milcren auch den husten/furderen den harn/füren
zimlich wol/vnd sind kein vngesunde speiß/sonder beko-
men

men dem Leyb wol/ vnd wo man sie fur andrer speiß im
nüchteren yßet/ so senfftigen sie den bauch/ vnd furderen
der stulgang / doch wo sie nit schnell durch gehent/ geben
sie kein leblich geblüt/ Wo man jr auch zu vil essen wür-
de/ verursachen sie gemelter vrsachen halb / grind vnnnd
schebigkeyt/ leuß vnd vngezyfer/ aber messiglichen genos-
sen / sind die Feigen ein nützliche vnd gesunde Arzney/
die auch wider Gifft widerstand thut / mit Nüss kernen
oder süß Mandel gessen. Die Feigen reynigen auch die
Leber/ das Wiltz vnd die Nieren/ vnd eröffnen die ver-
stopffung der selbigen / Doch hitzigen sie vnnnd erwecken
durst. Welche auch hitziger oder Cholerischer natur vnd
Temperaments sind/ in den selbigen vermehren sie die gal-
len/ oder Cholerische feuchte / darumb die selbigen/ wel-
che diser Complexion vnd Temperaments sind / sich der
Feygen vast selten inn der speiß gebrauchen sollen / oder
wo sie ye darzu lust hetten / sollen sie ein trüncklin Essig
thun/ darinn vil Zuckers zerlassen/ fur den Husten vnd
Brust sucht/ pflegt man die Feygen zu braten/ vnnnd also
warm zu essen / so mag man auch inn solchem fall / ein
nützlich dranc mit Hyssop/ vñ andren guten bequemen
Kreutteren/ der Brust vnd Lungen dienstlich bereittē/
Zu der speis pflegt man die Feygen/ in 8 zeyt der Fasten
inein gelb Pfefferlin einmachen/ auch mit Mandlen vñ
grossen/ Rosin oder mertreublin/ pflegt man ein Feigen
kess zu bereitten/ der inn der speiß auch vast nützlichen ge-
braucht wird/ Feygen gebraten vnd warm vber gelegt/
milteren vnd zeitigen harte geschwulst / inn sonderheyt
die Obrklam/ mit Essig vnd fenigrec gesotten/ wol zer-
stossen/ vñ vber die schmerzhaftigen Podagrischen fuß
vñ Zyperle gelegt/ stillt den hitzigen schmerzen/ Feygen
auffgeschnitten/ vñ umbgewand/ braucht man fur stul-
zepflin den jungen Kindern/ wann sie im leib hart od ver-
stopffet sind.

Carcum

CAreum Wissen Kummel / Der Samen des Wissen
Kummels/ist also gemein inn der Teutschen Küchen/
das er zu Fisch vnd fleisch/ gar nahe inn aller Kost ge-
braucht wird/gesortens vnd gebratens/ Ist hiziger vnd
truckner Natur im dritten Grad/ hilffet vast wol dewe/
vnd zerteilet alle windige plest im leib/ stercket vñ betref-
faget den Magen/stopffet/tödtet die Würm im leib / bes-
weget den harn/ledigt ab den zehē flegmatische schleim/
aber denen welche hiziger vnd Cholerischer Complexion
oder Temperaments sind/ vermeret diser Samen vil ge-
braucht die Gallen / oder Cholerische feuchte/ disen Sa-
men pflegt man mit Zucker zu vberziehen/ vñ brauchē ic.

CAlcus Käß/ So wir ye die warheyt bekenen wollē/
müssen wir sagen/das aller Käß schedlich vñ vnge-
sund sey / dann der Käß wird langsam vnd schwerlich
gedewet/verursacht scharpff auffstossen/ vnd cropffen/
erfüllet den Magen/mit Wind vnd plehung/vnd dringt
schwerlich hindurch / So empfahet auch der Käß von
dem Lap/darmit die milch geruhen wird ein scherpffe/
welche dem Magen schedlich/so ist der Käß an im selbs
nichts/ dann ein flegmatischer schleim / doch ye älter er
wird/ye scherpfer vnd hiziger er wird/vñ desto schwer-
licher zu dewen/gibt auch vil vngesundern safft der na-
rung/verursacht auch die wachung des Steins / sandt
vnd Griefß/inn Lenden/ vnd ist dem gangen leib sched-
lich / darumb man billich solchen Käß fliehen vnd ver-
meiden soll/Aber der Käß der noch nit veraltet ist/noch
solche scherpffe hat/ist nicht also schedlich vnd vngesund/
inn sonderheyt der das mittel haltet/zwischen dem alten
Käß vnd 8 milch/darum auch solcher frischer Käß/leicht-
licher dewung / dann der alt Käß / gibt auch besser ge-
safft der Nahrung/inn sonderheyt wo er nit zu hart/inn
rechter

rechter zimlicher massen gesalzen / vnd messiglichen ge-
nossen.

CAryophyllon Neglin / Diescharpfen/edlen/wolri-
chenden Neglin/ sind ein edel gebrauchtsam Ge-
würtz/ dem Magen/der Leber/vnd Herzen/vast nutz
vnd gut stillen dz vnwillen / so von vberflüssigen feuch-
ten verursacht wird/sollen doch den ineren gliedern sched-
lich sein/ als etliche furgeben etc.

CAstaneæ Kastanien/Wiewol dise Frucht / als ein
wild rauch holz gewechß/ den Sewen bequemer zu
der mastung / dann dem Menschen zu der speiß/ So ist
doch die welt also schleckerhafft / das sie nichts vngena-
schet leßet / Vnd geben gleichwol die Kastanien/gesot-
ten vnd gebraten/ reichliche narung / sind aber langsa-
mer derung/vnnd gehnd vast langsam durch/stopffen
vast seer/plehen hefftig/So man sie brettet vnd mit wein
besprenget / sind sie am gesündesten / Wiewol inn Genß/
Hüner/ Antfogel / vnnd dergleichen eingefüllet/vnd al-
so darinn gebraten/ sie auch den mereren teyl ierer sched-
lichheyt verlieren/ Inn graven punden derret man die
Kastanien auff/behalt sie vber das jar / sendet sie beym
fleisch/vnd vast vngesund/grob/beuerisch essen. Inn
hungers not / pflegt man solche dürre Kastanien auch
zu malen/vnd Brodt daraus zu backen etc.

CEpæ Zwyblen / Der Zwybel mag weder der reich
noch arm/inn seiner Küchen geraten / vil weniger
dann alles andren gewürtz / also gar wird kein speiß dis-
ser zeyt / annüttig bereittet / darzu nit zwyfel erfordert
werden/sind hitziger natur im andren Grad vnd feucht
im dritten/grober substanz/ furdren den Harn/verme-

ren den manlichen Samen/ vnd fur der speiß inn nüch-
teren gessen/machen sie lust zu essen/ richen aber inn das
Haupt/ vnnnd verursachen Haupt wee/ vnnnd sind dem
Haupt vnnnd Magen vast schedlich / inn sonderheyt die
rohen Zwysel/ So man sie aber kocht/ vnd die speiß mit
bereyt/ vnd annmachet/ verlieren sie den mereren teyl irer
schedlichheyt / dienen also bas der Brust/ benemen den
Husten/ vnd milteren die reuhe. Sie ledigen ab die zehen
Schleim/ plehen den Magen/ vnd wer vil Zwysel yßet/
der bekömpft ein böß bresthafftig Milz. Die rohen Zwys-
fel eröffnen die güldin Adern/ so vertreybt der Safft die
scheuzlichen flecken der Haut/ die gebraten Zwysel wey-
chen vnd zeyttigen.

CErurum Carnes Hirzen Wildtpredt / Ob gleich
wol das hoch Wildt/ auch inn fürsten Küchen/ al-
lenthalben hoch geachtet / vnnnd ein köstlich Wildpredt/
gibt es doch böß gefafft der narung/ vñ ist ganz schwer-
licher dewung/ vnd gebiert ein grob dick Melancholisch
geblüt. Aber Winters zeyt/ ist solchs hoch Wild nützer
vnd gesünder/ zu brauchen inn der speiß/ nit allein der vr-
sach halb/ das alles Wildpredt Winters zeyt/ feister ge-
schlachter/ vnd zu der jagt geschickter / sonder auch/ das
es von wegen der innerlichen werme/ leichtlicher im ma-
gen concoquirt oder gedewet wird/ Dann wo solches nit
genugsam gedewet wird/ gibt es nit allein/ ein grobe/ di-
cke/ zehe/ schleimige feuchte/ sonder verursacht auch/ ver-
stopffung der Leber/ vnd Milz etc.

Man schreibt auch inn sonderheyt/ dem Hirzen wild-
predt zu/ wo man sein inn der speiß zunil/ vberflüssig/ vñ
on vnderlaß braucht/ wie an etlichen fürsten Höfen der
brauch / dz der ganze leyb daruō dermassen geschwecht
werdē sol/ dz er vō zytteren vñ bebē/ ganz krafftloß wer-
de/

de/Darmit man aber das Hirzen wildpriedt/geschlach-
ter/vnd dewiger mache/haben vnserē Köch ire besondre
reglen/mit dem einbeizen zum braten / oder inn Pfeffer
zu bereitten/mit gutem Gewürz etc.

Das Hirzen marck ist ein kostlich Arzney/ alle harte
geschwulst vnd schwülen zu sänfftigen/vnd milteren/ so
man sich auch harte verbrant hat/ ist das Hirzen vn-
schledt ein trefflich leschung/ vnd heilung / wie auch vnserē
Teutsche Schmidt inn teglicher erfarnuß haben. Der
rauch von Hirtz horn / sol alles Ungezyfer vnd giftige
Thier vertreiben/ So ist auch das Hirtz horn/ klein ge-
schaben oder ab gefeyhelet/ein krefftige Arzney/den kin-
dern die Würm zuuertreiben/doch sol dises der Lungen
etwas schädlich sein etc.

Cerasia Kirßber / Ob gleich wol der Kirßber / bey
vns Teutschen/ diser zeyt ein treffliche vile/manch-
erley vnderscheyd/inn farben/ geschmack vnd gestaltd/
so zu lang dises orts zu erzelen / so sind sie doch vast alle
gleicher Natur/oder Temperaments/ nemlichen zu keltē
vnd feuchte geneigt/ vnd geben ein böse gesafft der Na-
rung/bekommen auch dem Magen vast vbel/ dann sie
dem feuchten Magen vber die maß verleglich sind / vnd
schädlich/in sonderheyt wo sie noch nit volkömlichen zey-
tigen / aber denselbigen welche ein hitzigen trucknen ma-
gen haben/ den sind die Kirßberen ein nützliche Speys.
So man sie auch inn hitziger Butter wol brattet/ Wein
daran geussset/schnitten brot darauff legt/vñ nach Teut-
scher manier antragt/mit Zucker oberstreichet/ ist Sum-
mers zeyt ein nützliche/bequeme/ kühlende speiß/an vilen
orten Teutsch landts vast gebreuchlich / was man wei-
ter von den Kirßen/Weichßle/Amarellen/vnd derglei-
chen bereidt / wird hernach an besondrem bequemen ort
angezeigt.

Cicer Zyser Erbeiß / Die Zyser Erbsen sind im El-
saff vil gemeiner / inn reicher leut Küchen / dann inn
andren orten Teutsch landts / inn sonderheyt bey denen
so mit dem Stein / Sandt / vnd Gries behafft sind / vnd
nit vnbillich / dann solches gemuß oder gekochsalb / das
aller reuest vnd vnlieblichst in seiner substanz / fur den
andren allen / sind mancherley geschlecht / doch allein der
Farben halb vndercheiden / sunst alle gleicher Natur /
krafft vnd eigenschafft / warmer vnnd feuchter Natur /
im ersten Grad / sind schwerlicher dewung / geben vil
vberflüssigkeyt / führen doch baß dann die Bonen / haben
ein treffrige eröffnende krafft / darumb sie den Weibern
ire gebürliche reinigung furderen / erwecken plehung / ver-
meren dz Wiltz / brechen den Stein inn Nieren vñ Blas-
sen / darumb inn solchem fall / die Zyser erbsen brülin inn
grossen brauch sind / doch wo die Blasen verletzet / oder
sonst bresthafft / ist ir solche brü schädlich etc.

Citra Citrinaten öpfel / Ob gleich wol die edlen schö-
nen / wolriechenden gelben / Citrinaten / oder Indē
öpfel / nit sonderlich bey vns Teutschen im brauch zu der
Speiß zu niesen / haben wir doch der vrsach halb / dz die
Limonen vñ Pomerangen / so wir im teglichem brauch
haben eben der selbigen Art / Natur vnd Eigenschafft
sind / solche edle schöne wolriechende Frucht nicht vber-
schreiten wollen / vnd aller solcher öpfel / wolriechende
cusserliche rinden / warmer vnd truckner natur / aber dz
weyß nach der rinden / wird kalter vñ feuchter natur ge-
achtet / aber der inner sawer safft / ist der aller kaltest / auß
genommen inn den süßen Pomerangen. Der Citrinaten
Apfel / hat des weissen marck oder fleisches am meisten /
ist aber vast schwerlicher dewung / gebiert ein grobe fleg-
matische feuchte / darumb wird sie nit rohe oder fur sich
selbst

selbst allein gessen / dann sie vast ungeschmack / sonder man pfleg sie / gar schön vnd köstlich / mit Zucker ein zu machē/ als wir dann an besondrem ort auch genugsamen lichen anzeigen werden / vnd ist solchs nit allein ein herrliche speise inn der reichen Collatien / sonder ein krefftige Arzney etc.

Die rinde der Citrinaten/ Pomerangen/ vnd Limonen/ furdert die dewung der speiß / demmet die Melancholische feuchte / vnd allen vnmuth vnd traurigkeyt/ so daruon verursacht werden/ dienet auch dem Magen vber auß wol/ doch sol man sein nit zuvil essen/ dann sonst möcht sie nit wol gedewet werden / So aber dise rinden eingemacht werde/ sind sie nit also schwerlicher dewüg/ erhitzigen den Magen wol/ vnd führen auß die feuchtheit der selbigen/ vnd helfen auch andre eingenommene speise zu dewen/ Die Kernen oder Samen sind nit tauglich zu der speiß/ werden allein in Apodecken gebraucht/ ein nützliche krefftige Arzney / fur alles gift/ vnd giftiger Thier schedigung/ eingetruckten vnd eusserlichen vbergelegt/ darumb man sie nit also leichtlichen/ wie man gemeiniglich pflegt / hinwerffen sol / Das sawer safft innerhalb diser frucht/ leschet vnd demmet die Cholerische feuchte/ ist ein nützlich vast krefftig safft / nit allein allerhandt speiß / darmit zu niessen vnd an zu machen/ sonder auch köstbarliche/ labhafte Syrop daruon zu bereiten etc.

Cina momum Zimentrinden/ Vnder allem gewürz so inn vnseren Teutschen Küchen im brauch / ist die scherpf außgebissen Zimentrinden / die aller lieblichst vnd einmütigst/ inn aller Kost/ darzu sie gebraucht wird/ Ist vast hitziger vnd truckner Natur/ reinigt den Magen/ vnd vertreibt den husten/ von feuchtheit vnd flüssen

verursacht / dann der Zimmet verzeret vnnnd trucknet alle feuchte/des Haupts/der Leber vnd des Magens/doch sol man inn eruelung des Ziments/ guten fleyß anwenden im ausbeissen / die die alten erfahren Medici bey vñ. vnder schidlicher art / vnd manier der Zymentrinden setzen / ye eine besser vnd scherpffer dann die ander. Im kurtzer summa zu beschliessen/ ist der Zimmet dem Magen vast nutz vnd bequem / hilfft im zu der derung der eingenommenen speiß/verzeret/ erdünnere vnnnd ledigt ab / die zehen flegmatischen schleim / hat ein eröffnende Krafft/furdert den harn vnd Weibliche reünigung/dient wol den Wassersüchtigen / vnd erhitzigt die kalten Tieren/ Ist furnemlichen ein nützlich vast gut gewürz/ denen welche kalter vnd feuchter Complexion sind/die selbigen solten alle ire speiß mit Zimmet rinden bereitten/vnd einmachen oder würzen etc.

Columbulorū caro Jung Tauben/Die jungen Tauben/sind kein böse oder vnnütige speiß / darumb sie inn den reichen Küchen vil platz haben/sind warmer vnd feuchter natur/vnnnd geben vil vberflüssigkeyt/inn sonderheyt die zamen jungen Tauben/geberen auch ein vast grob vnnnd hitzig Geblüt vber die maß/ darumb sie auch/wo man je zuvil niessen würde/ mit der zeyt febres erwecken/erwarmen die erkalten Lenden/vnd Tieren/vermeren das Geblüt vnd den natürliehen Samen/ solten doch dem Haupt vnd Augen schedlich sein. Es wolten auch etliche furnemen vnd erfarnie Medici / wo man 8 Tauben in 8 speiß/zuvil vberflüssig niessen oð brachē werde/ dz zu letzt die Galzy oð feldtsucht volgen würde. Merck auch das die jungen Tauben/so im fröling vnnnd Herbst außgehecket werden / vil gesünder sind/dann die so des Summers oder Winters zeyten außschliessen etc.

Corian

Coriandrum Coriander / Ob das Kraut dises Sa-
mens / wann es grün ist / gleichwol schendlicher vñ vil
vbelser stincket / dann kein wandlauff knölster od leiden /
so ist doch der Samen inn der Küchen / vñ Apotecken
also angenehm / das man sein nit geraten mag / ist kalter
Natur im ersten grad / vñ trucken im dritten / dem Ma-
gen vast nutz vñ gut / dann behalt die speiß im Magen
so lang / das sie volkumlichen gedewet wird / Doch sol
man sein nit zuvil brauchen / inn sonderheyt wann er nit
genugsam gederrert ist / dann also bringt er verwirrung
der vernunft / dann Coriander samen beyget man inn
Essig / vñ trucknet in wider / im solche schedlich heyt zu
benemen etc.

Crocus Saffran / Der Saffran ob er gleich wol
auch dise zeyt / des Teutschen Luffts vñ Erdreich
gewonet / also das er schon vñ gut bey vns bekömpft / so
ist er doch ein thewer köstliche Würtz / nit weniger in der
Küchen / dann inn der Argney gebrauchlich / dann wer
wolt erzelen können / wie mancherley speiß mit dem Saf-
fran gelb geferbt werden / also das auch stinckent fleisch /
des Saffrans nit entberen mag / so man ein gelbs brü-
lin / oder Pfefferlin daran machet / wie dann auff dem
Straßburgischen Trinck stuben / ein langherbracht ge-
brauch / der in ein sprichwort geraten / an stinckent fleisch
gehört ein gelbs brülin etc.

Vñ aber der Saffran / warmer Natur im andren
Grad / vñ trucken im ersten / wiewol er von etlichen war-
mer Natur / biß inn dritten Grad gesetzt wird / ist dem
Magen ein nützliche gute Würtz / hilffet der dewung /
hat ein eroffnende krafft / thut widerstandt den gebrech-
en / welche von zehem flegmatischen schleim verursacht
werden / reizet zu vntenscheyt / ist nutz vñ gut allen in-
nerlichen

nerlichen Glydren/benimpt das schwerlich athmen/dan
so man den Saffran inn der speiß messiglichen braucht/
so macht er ein ringen sanfften Achmen/ vnnnd gibt dem
Menschen ein schöne lebliche farb/wo man sein aber zu
vil vnMESSig braucht/gibt er ein bleiche farb/verursacht
schmerzen vnd hauptwee / benimpt auch den Lust vnd
Appetit zu der speiß etc.

CYdonia Quittē/Ein edle schöne wolrichende frucht
so doch rohe inn der speiß ganz vntauglich / sind
Kalter Natur im ersten Grad / vnd trucken im andren/
Dise frucht alstringirt / sterckt vnd betrefftigt den Ma-
gen / vnnnd so man sie fur der speiß braucht/stopffen sie/
furderen den Harn / vnd wo man jr zuvil inn der speyß
braucht/ sind sie vast schwerer dewung / Die süßen ge-
schlachten Quitten/so man apffel Quitten nennet/ stop-
fen vnd alstringiren nit also hefftig / als die rauhen vnd
Knorigen Quitten/Dise frucht stillt auch den vnwillen
vnd oben hinauß brechen des Magens. So man von
der Quitten Latwergen / oder eingemachte Quitten /
oder inn der Aschen gebraten Quitten/ auff die eingenom-
men speiß neußt/stopffet wie ob gesagt/ lasset aber nit die
schedlichen bösen dempff / vberlich inn das Haupt stey-
gen/Was weiter von Quitten bereyt zur Speiß/ oder
Argney / ist dem Magen vnd der Leber vast gesundt/
vnd gut etc.

CVminum Römischer Kymel / Wiewol der Römisch
Kymel/ eins vast starcken geruchs der nit yedermā
leidlich / der Argney bequemer dann der Speiß / ist er
doch auch in die kuchen geraten/Kymelsuppen darvon
zubereitten/auch mit dem frischem rindfleisch kymel brü
zu sieden/ deßgleichen inn die rohen Würst zu salben/
vnd

vñ der gleichen speisen mer darzu/8 Römisch kymel diser
zeyt/ inn sonderheyt inn Niderlendischen sietten/ teglich
en gebraucht wird/ ist warmer vñ truckner Complexion/
im dritten Grad/ bewegt den Harn treffiglichen/ vñnd
zertheylet alle plehung/ vñ windige plest im leib/ vñ in son
derheyt die plehung des Magens/ doch wo man sein zu
vil inn der speiß brauchen würde/ gibt er dem Menschen
bleiche/ vnlebliche/ tödtliche farb/ Stopfet blutfluß/ auch
das bluten der Nasen/ desgleichen der Weiber gebürlic
he reinigung etc.

DAmascena Zwetsgen/ Die auffgedornen Praumē/
nennen wir mit frembden/ Behemischen vñ Pol
nischen namen Zwetsgen/ vñ werden mancherley auß
frembden Nationen/ Behem/ Franckreich/ Vngerē vñ
Welsch landen/ zu vns gebracht/ nit weniger der Kuchē
dann der Apoteken gebreuchlich/ so pflegt man auch di
se zeyt / in lust Gärten solche Praumen zu propffen vñ
pflanzen/inn sonderheyt die Damascena/ welche fur die
besten geachtet werden / sollen erstlichen von Damasco/
inn dise Landtart gebracht worden sein / daher wir sie
noch Prumen von Damasco nennen. Die Praumē wer
den kalter vñ feuchter Natur gesezet/ sind dem hiziḡē
trucknen Magen vast nutz vñ gut/ von wegen irer feu
chrigkeyt/ lindren sie auch/ vñ sänfftigen den Leib zum
stulgang/ grün sind sie dem Magen nit also nutz/ auffge
dert etwas bequemer/ sollen den lust vñ Appetit zu der
speiß benemen/ furnemlichen die süßen/ sind denen nicht
nutz welche vol flegmatischer feuchte sind / führen vast
wenig/ Vnder dise Praumen mögen wir auch vnserē hy
lendische Pflaumen zelen / vñ fur das erst die weyssen
Pflaumen/ oder Spylling/ die ganz Schnee weiß sind/
die sind schwerlicher derung / aber die gelb farben/ wie
L ein

ein War/ ein grobe zehe schleimige feuchte/ vnd sol man
aber alle dise Frucht/ wann sie frisch sind/ inn nüchteren
fur anderer speiße nießten/ Welche sawer vnnnd vnzeyttig
sind / als die kleinen runden Pflaumen / die man Wein
Kriechen nennet/ die stopffen den Bauch etc.

Die rechten auffgedorren Damascena / mag man inn
der not vast nützlich brauchen/ ein drancß daruon gesot-
ten/ inn allen hitzigen brünnenden fehren / dann solcher
drancß die hitz leschet vnnnd miltet/ ist auch denselbigen/
vast nutz vnd gut/ so innerhalb im Leib/ vast hitzig vnd
trucken sind/ oder hitziger vñ truckner Complexion vnd
Temperaments.

F Aba Bonen / Die durren Bonen sind ein speiß/ der
groben hart arbeitenden Leuth / aber die zarten
grünen Bönlin/ sind auch in reichen Küchen angenehm/
vnd so man sie inn der speiß braucht/ geben sie ein luctloß
fleisch/ plehen vast ser/ in sonderheyt wo einer solche spei-
ße braucht/ der jr nit gewonet wer/ doch wo man sie wol
zu bereittet / sind sie desto weniger schedlich. Von den
durren Bonen schreiben alle erfarnē Medici/ so mancher
ley vnradt/ vnnnd schedlichheyt/ das wir sie nit vnbillich
auß der Küche banen soltē. dan sie sollē ein böß vngesunde
gessaft der narung geben/ vnd ein böß geblüt/ die nechtl-
che ruhe vnd schlaff/ mit mancherley fantastischen treu-
men/ vnd gespensten verhindern / vñ vnrüwig machen/
darumb wie diese Bonen gedencen zu geraten etc.

G Allinæ Hüner/ Wir haben in Teutschland die Hu-
ner inn vast gemeinem brauch/ inn der Speiß vnd
nit vnbillich/ dann solche speiß vast leichtdewig ist / vnd
ein gut gesunder Gafft der Narung gibt / inn sonder-
heyt der jungen Hüner / die yetzund wöllen anfaben
legen/

legen/Solche Hüner wo sie ein wenig feist/ befeuchtigen sie den Leib/vnd geben im ein schöne/ liebliche/vnd lebliche farb/vermeren auch die Substancz des Hirns/vnd Manlicher samen/ inn sonderheyt das hirn von Hünereu gessen/ dan solches vast reich ich vnd wol füret/ Die jungen Hüner welche doch zeyttig/ sind auch vast leichter dewung/vnnd geben ein gut gesundt Temperirt Geblüt/ dz weder zu dünn noch zu dick/sind den müßig gehende/in sonderheyt denē / so gar wenig leibliche vbung haben/ein nützliche bequeme speiß/ deßgleichen denselbigen/welchen die innerlichen geng im leib/ leichtlichen verstopffet werden/ vnd auch denselbigen / so ein vast hitzigen Magen haben.

CRuum carnes Kranich fleisch/ Bey vns Teutschen pflegt man dem schönen Vogel/dē wackeren wechter/dem Kranich / nit allein nach zu stellen/ seiner schönen Federen halb / sonderen auch seins Leibs halben/welcher ein vast gut Wildpredt/ ist hitziger vnd truckner Natur/vast aderig vnnd voller faseren/darumb man in ein tag zwen oder drey halten muß/ehe dann man in bereyt zu der speiß/ darmit er mürb vnd geschlachter werde/ Gibt ein grob Melancholisch geblüt/ darumb solche speiß denen/ so Melancholischer Complexion vnd Temperaments vnbequem.

HOedorum carnes Kyzen fleisch oder Zuckin fleisch/ Ist inn vnseren Teutschen Küchen auch vast gemein/ doch nit also angenehm als das Lambfleisch/ So es doch vast leichter dewung/ gibt aber wenig Nahrung/dan es füret nit wol/ gibt auch ein dünn feucht geblüt/ist denert am gesündesten / welche warmer vnd truckner Complexion sind/doch geben auch dieselbigen Kyzlin/ oder Zy

2
clin/

Älin/ vil besseren gefasst der Nahrung/ Welche nicht zu jung vnd der Milch zu nahe / oder zu alt sind / dann so baldt ein Kyglin vber v. oder vj. Monat alt/ sol es nit mer ein Kyglin oder Zyglin/sonder ein junge Geyß od Zugen genant werden. Etliche halten darfür/das die geferbten Kyglin/vil besser vnd gesünder sein/dann die ganz weissen etc.

LAc Milch / Die Milch ist ein Ernererin vnd auffbringerin des Menschen / von anfang seiner Geburt/an welche er nit erhalten/ oder ernert werde mag/ mag vnderschieden werden inn dreyerley Substancz / als erstlich inn die Wesserig Substancz / des Molckens oder Schottens/die ist dünn/reinigt vnd sänfftigt den bauch/ so man sie von der Milch scheidet/vnd drinckt / Die ander Substancz/ist gröber vnd dicker/vñ ist die Substancz des Käß/die selbige stopffet/Die dritt Substancz/ist das Fett oder Butter/welche das mittel haltet/ zwischen den andren beyden/Vnd ist zu mercken das ein yede Milch/ye mer sie der erste dünnen/wesserigen Substancz in jr hat/ye gesünder sie ist/Aber yemer sie 8 Substancz des Käß in jr hat/ye vngesünder vñ schedlicher sie zu achte/dan solche Milch verstopffet die Thieren/vñ Leber/vnd verursacht den stein zu wachsen / Man sol aber furnemlichen warnemen/das das Vihe daruon die Milch gemolcken wird/gesundt sey/nit zu feist/vnd nit zu mager/vnnd ye frischer die Milch gemolcken / ye besser vnd gesünder sie ist / dann ye lenger sie stehet / ye schedlicher sie genossen wird/am besten sol die Milch süß sein/ aber kein andere geschmack ganz vnd gar / darinne gespürt werden/ an der farb soll sie nit bloe oder groefarb/sonder ganz weiß sein/So man die Milch mit massen/ wie sich gebürt nützet/so befeuchtet sie den Leib / inn sonderheyt wo sie gebürlicher massen gedewet wird / bekömpft also dem Leib vast

vast wol/dienet inn sonderheyt der Brust / vnnnd Lungen/aber dem Mageninn sonderheyt der feucht ist/ bekômpt die Milch nit wol / vnnnd wie der alt namhaftig Griechisch Medicus Hyppocrates anzeigt / erwecket die Milch Hauptwee / darumb setzet er ein sonderliche Regel oder Aphorismum/dz man denselbigen so mit hauptwee behafft / oder darzu geneigt/kein Milch geben soll/ dann die Milch verwandelt sich leichtlichen im Magen/ vnnnd gerinner darinnen/ darauß grosser vnradt entsethet/ Die Milch ist auch den Zänen vñ billeren schedlich/ vnd verletzet sie/ darumb sich die selbigen fur der Milch hütten sollen/welche blöde schwache Zän vnd Zänfleisch haben/ oder wo sie Milch niessen/ sollen sie den Munde mit Wein sauber abspielen/Die frisch gemolcken Milch also warm inn die Augen gethan / miltet die scharpffen fluß der Augen etc.

L Actuca Lactucken/ oder Lactic, Ist bey vns Teutschen / das aller gemeinst vnd gebreuchlichst Salat Kraut/kalter vnd feuchter Natur im dritten Grad/ Dieses Salat Kraut/leschet den durst/macht sanfft schlaffen/ wird auch nicht also schwerlich gedewet / als andre Koch Kreutter/so man inn der speiß braucht/sänfftigt auch den stulgang gar wenig/ gibt auch nit gang vñ gar gesunde geblüt/das doch auch nit schedlich ist/oder gang vñ gar leblich/ist vast nuz vñ gut denselbigē/welche ein higigen Magen haben/doch sol man dises Kraut nit zuvil brauchen/dann der Leib wird daruon geschwecht / vnd das Gesicht befinstert / vnnnd die fleischlich begirde daruon genglichen erloschen vnd benomen/ Welche blut speyen/die sollen dises Kraut vermeiden/ deßgleichen alle die so schwerlich athmen/ oder hefftigen keuchen/vil flegmatischer Feuchte bey sich haben / oder flegmatischer Complexion vnnnd Temperaments sind / Vnnnd vorab

dieselbigen / welche begeren Kinder oder Erben zu ziehen / So man Lactic bletter zerstößet / vnnnd mit Rosen wasser vermischet / Leinin tüchlin darinn netzet / vnd an die schläff legt / macht die stettig wachenden / so jr natürlichhe rhu oder schlaff nit haben / mögen senfftiglichen schlaffen.

LEporum carnes Hasen fleisch / Der Hase ist inn Teutschland / vnser Edelheut vnd Stadt Junckeren sonderliche hoffliche kurtzweyl / verwar ein schlechte Wildpret / doch in reichen Küchen hoch berümbt / ist masten vñ feisten leuthen / die gern mager werdē wolten ein vast nützliche speiß / aber die vorhin dürr / mager vñ ran von Leib seind / die sollen sich des Hasen fleisch messigen / dan solchs gibt ein grob dick Melancholisch geblüt / kopffet den Bauch / furdert aber den Harn / Doch wo man solches fleisch vermag genugsamlichen / vnd wie sich gebürt zu verderwen / so gibt es auch gute narung / vñ füret vast wol / dienet fur verstopffung des miltz / vnd der Leber / soll aber der Lungen schedlichen sein / macht vnru vnd stettigs wachen / Das Hasen hirn ist denen vast nutz vñ gut / zum offeren mal gessen / die hefftig zytteren vnd beben inn Gliedren etc.

MAla Depffel / Der Depffel sind auß vilfaltiger pflanzung / ympfunff / vnd belzung halb / mancherley art vnd vnterschied / bey vns Teutschen erwachsen / inn Form / Gestalt / Geruch vnd Geschmack / wo man solche nach ordnung beschreiben oder erzelen wolt / das es ein sonderlich Büchlin erfordren würde / wie dann allen dennen zu wissen / welche Teutschland etwas durch wandret haben / aber inn kurtz von solchem obs zu schliessen / sehen wir das die selbigen Depffel / welche ein rauhe vnnnd
astrin

astringirende Krafft / haben ein kalten vnnnd yrdischen
 Saft der Nahrung geben / aber die süßen öpfel sind eins
 mittleren rechtmessigeren Temperaments / zu wermie mer
 geneigt / darumb muß man wissen / welche art einem yes
 den am bequemsten / vnd gesündesten / als nemlichen /
 die ein reuhe haben / vnd astringirende Krafft / sind denen
 am aller gesündesten / vnd nützlichsten / so ein hitzigen feu
 chten magen haben / dan solches vnmässig temperament
 oder verandring der Complexion / dardurch wider zu
 rechten masse gebracht werdt / aber die sawren Depffel
 sol man niessen / wo im magen sich ein dicker / grober /
 schleim sich samlet / der doch nit zu kalt sey / dann die sau
 ren öpfel ledigen oder lösen ab / die schleimige / zehe / feu
 chte / vnd führen denselbigen durch den stulgang hinweg /
 Aber die süßen öpfel sol man denselbigen geben / die ein
 kalten magen haben / welchen sie am gesündesten sind /
 Aber inn einer summa zu schliessen / sind alle art vnd ges
 schlecht der öpfel / bey den alten erfarnen Medicis in ver
 dacht / das sie den Nerven oder weißem Geäder / sollen
 schedlich vnd verletzlich sein / inn sonderheyt die rohen
 öpfel / aber solche schedlichheyt verlieren sie vast leichtli
 chen / durch mancherley künstliche bereitung / inn der
 Rüchen etc.

MAla punica Granaten öpfel / Vnder allen Baum
 fruchten / ist der Granaten apfel / also ein wilde vn
 gepflanzete Frucht / gar nahe die aller schönest vñ wun
 derbarlichst / gewonet vnser Teutschen lufft / das er inn
 zimlicher größe wachset / plühet vnd Frucht bringt / die
 mag aber von reuhe vnd kälte wegen / der witterung nit
 fürkommen / vil weniger dann die Feigen / vnnnd andie
 frembde außlendische Gewechß / welche wir alle vnder
 dem namen Welsch begreifen.

Vnd

Vnd sind aber diser schönen / holdseligen / lieblichen
öpfel dreyerley natur / vnd vnterschiedt / dann etlich am
geschmack sauer / etliche süß / etliche aber haben ein wein
sawerē geschmack / das ist zu keinem theyl geneigt / weder
sauer nach süß / Die süßen Granatē öpfel / sind der brust
vast nutz / geben ein gut safft der narung / vnd haben ein
wermende krafft / aber die sawren Granaten öpfel / be-
wegen den Harn / vnnnd sind vast krefftig / nützlich / vnd
gut / zu allen feylen vnd gebrechen / die von der Gallen
oder scharpffen Cholerischen materij verursacht werde /
inn sonderheyt inn grosser / vnd hefftiger hitz vnd ent-
zündung / des Magens vnd der Leber. Dient auch für
den Sodt / vnd das jucken im Magen / von schedlichen
feuchten verursacht. Den safft von süßen vnd sawren
Granaten / so man Granaten öpfel wein nennet / zusam-
men vermischet vnd eingetruncken / sänfftigt den bauch /
vnd füret auß / Gallen oder Cholerische feuchte / on alle
beschwerus / oder nachtheyl / stercket auch vnd betref-
tigt darbey den Magen / Welche kalter natur sind / sol-
len die Granaten öpfel vermeiden / dann darnon wird
inen aller lust vnd Appetit / zu fleischlicher begird beno-
men. Sawer Granaten öpfel safft mit Honig vermi-
schet / vnd in die Augen gethon / bringt wider das verlo-
ren verduncklet Gesicht etc.

MEl Honig / Ob gleich wol der Honig dermassen
von Apoteker / zu sich inn seinem gebrauch einge-
zogen worden / das er gar nahe on Honig vnd Zucker /
kein Confect machen oder bereitten kan / ist er doch auch
inn der Küchen / seiner lieblichen süßigkeyt halb / manch-
erley speissen darmit an zumachen / nit weniger angenehm
vnd gebreuchlich. Warmer vnd truckner natur im an-
dren Grad / hat ein reinigende oß mundificirende krafft /
mit

mit etwz scherpffe/ dardurch er auch zum stulgäg reizet/
doch furdert oder bewegt er mer den Harn/ es sey dann
sach/ das man ein Honig Wasser daruon bereite / daß
der Honig nit allein/ wie gesagt den Apoteker / sonder
auch dem Koch vnd Keller/ nützlich vnd gebreuchlich zc.

Alten Leutthen vnd denen/ so kalter Complexion vnd
Temperaments sind / ist der Honig vast nütz vnnd gut/
aber die hitziger Complexion sind/ sollen den Honig mei-
den/ dann er verwandelt sich inn inen leichtlich/ inn gal-
len oder Cholerische feuchte / Der best Honig sol lieblich
süß sein/ mit etwas scherpffe/ gelber farb / zimlich feyst/
vnd etwas dünn/ vnd ist der Honig so im fröling abge-
nommen wird der best/ nach demselbigen der Summer ho-
nig/ aber der winter Honig/ ist zu der speiß vntauglich/
dann er vast leichtlich inn Gallen/ oder Cholerische feuch-
te verwandelt wird/ furnemlichen denē so ein hitzigen
Magen haben. So man Honig zu end der malzeyt ys-
set/ so man vil Wein getruncken hat/ lasset den Wein nit
vbersich steigen / oder die schedliche Dünst vnd Dampff/
vbersich riechen inn das Haupt / derhalben die Hispan-
nier wo sie Wein trincken / gewöhnlichen Honig drauff
set.

So hat auch Key: May: im brauch/ inn der malzeyt
Honig zu niessen / Der Honig bringt auch lust vnd Ap-
petit zu der speiß/ denselbigen/ welche von wegen zehrer/
schleimiger materij/ wenig lust haben zu essen/ dann der
Honig ledigt ab die zehen flegmatischen schleim / Aber
alle speise so man mit Honig bereitet / sind schwerlicher
derung / vnnd wo sie nicht genzlichen gedewet wer-
den/ verursachen sie verstopffung der Leber / vnnd des
Milzges / zuuilsaltiger gebrauch/ der Honig speissen soll
auch rand/ grind/ vnd schebigkeyt verursachen etc.

MEspila Nessel / Der Nessel haben wir in Teutsch
landē dreyerley art / die schönē grossen gepflanzte
Nessel / die gemeinē kleinen Nessel / vñ die wildē nessel /
die mā Elzber vñ Elbseten nennet / sind alle im brauch /
in 8 so pflegt mā sie auch ein zu machen / nemlichē die Ne
spelin Honig vñ Zucker / aber die Elzber allein in heffen
oder krausen / von gutem krefftigen wein etc. Die Nessel
sind so rauch vnd herb / das man sie nit niessen mag / sie
seind dann von langem ligen gantz erzeyttigt / das sie
weich werden / stopffen den Bauch etc.

MIllium Hirsen / Der ist bey vns Teutschen ein vast
gemeine speiß / vñnd tegliche kost / bey dem gemeinen
man vñd Bawersuolck / kalter natur / schwerlicher derw
ung / stopffet den Bauch / vñd verhindert den stulgang /
gibt auch geringe narung / füret wenig / ist denē ein nütz
liche speiß / welchen von nöten ist / den Magen zu kühlen
vñnd trucknen / doch so man in mit guter Milch / oder
Mandel milch kochet / wird er nit also vñdewig / vñnd
auch inn den reichen Küchen also bereitet etc.

NVces Gemeine Nüss / Die nennen wir auch Wel
sche nüss oder Walnüss / die pflegen wir dürr vñnd
grün inn der speiß zu niessen / Die grünen frischen Nüss /
sind warmer natur im ersten Grad / Wo man sie aber
auffderret / werden sie hitzig im andren Grad. Die
grünen Nüss sollen den Bauch flüssig machen / sind leicht
licher derwung dann die Mandelkern / Aber die durren
Nüss / wo man je zuvil neisset / fressen sie den Munde
auff / vñd erwecken das essen im Munde / vñd dergleich
en schedigung / darinn derhalben der brauch inn reichen
Küchen / die durren Nüss inn wasser ein zu weichen / vñ
widerumb grün zu machen / aber doch sind die Nüss am
taller

aller gesündesten/so man sie als man inn der Fasten zeyt pflegt/mir Feygen ysser/ Nüss vnd Feygen zu samen/so man auch Nüss Kernen/ Feygen vnnnd etliche Rautten bletter miteinander ysser/ in nüchteren fur andrer speiß/ ist ein krefftiger widerstand vñ Tiriac / wider alles gift/ vñ wird solches Remedium von allen erfarnen Medicis/ als ein sonderlich gāz gewiß vnifelbar Experiment/ vber die maß hoch gelobt etc. Die einen kalten Wagē haben/ die derwen die nüss leichtlichen/ aber die ein hitzigen Wagen habē/ die sollen der Nüss sich nit vil gebrauchen/ dan sie verwandlen sich inn ein scharpffe Cholerische feuchte/ welche weechumb vñ schedigung im halß erweckt/ haupt wee verursacht/ vnd hefftigen husten bringt etc.

NVx Muscata Muscaten nüss / Die edle Nüsslin/ braucht man als ein gewürtz inn der speiß/ wiewol sie auch eingemacht genossen werden/ sind warmer vnd truckner natur im andren Grad / stopffen den flüssigen Bauch/ vñ vnmesßigen durchbruch des leibs/ als wir oben auch anzeigt haben/ in beschreibung 8 Bonen. Die Muscatē nüss sind dem Wagen vñ der Leber/ vast nutz vnd gut/ stercken vnd bekrefftigen sie/ vnd benemen alle veraltete feel vnd gebrechen der selbigen / doch sollen die Muscaten nüss als etliche erfarnē Medici inn sonderheyt verzeichnet haben/ der Lungen schedlich sein.

OLeum commune Baum öl / Das süsse Baum öl so man auß den wolzeyttigen Oliuen außpresset / ist zimlicher werme/vnnnd befeuchtig mehr/ aber das grüne Baum öl so von vnzeyttigen Oliuen außgepresset worden/ye rauher vñ herber es ist/ye mer es feltet. So man das Baum öl waschet wird es süß / vnnnd verleuret alle scherpfße/ Das Baum öl ye älter es wird/ye mer es hitziget/vnd discutirt oder zerteylet. Das Baum ölist inn vñ

seren Teutschen Küchen nit weiter gebrenchlich / dan die Salat kreutter / Rappreß / Spargen / vnd was dergleichen ist mit Essig vñ Salz anzumachen / welcher vrsach halb sich sein Natur vnd eigentschafft mancherley verwandelt / nach der art vnd eigentschafft der speiß / welche darmit angemacht wird etc.

O Riza Keyß / Der Keyß ist bey vns Teutschen ein fremde frucht / so vnserer Velder vnd Lufft auch nit gewonet / ist aber doch inn ganz gemeinem brauch / durch gang Teutsch landt / gibt zimliche Narung / vnd füret wol / ist aber langsamer vnd schwerlicher dewung / Der Keyß flosset / doch so er mit guter vnuermischter Milch / oder feister fleisch vnd Hüner brü / kochet vnd bereyt wird / ist er ein nützliche speiß / welche dem Leib wol bekümpft / starck vnd leibig macht / ein gutelebliche farb gibt / vnd den natürlichen Samen vermeret etc.

O Va Ayer / Es sind furwar die Ayer ein vast nützliche Kost / gefunden vnd Francken / reichen vnd armen / dann wir Teutschen kaum ein stück inn vnseren Küchen haben / daraus man also mancherley richt bereitten kan / als von Ayeren / vnd werden aber die Ayer dreyerley von einander vnterschieden / als fur das erst in ihr eignen Substancz / der ander vnscheidt / ist nach der zeyt / nemlichen ob sie frisch oder alt seien / aber der dritte vnterscheidt ist / noch dem sie bereyt oder kochet werden / dann die gang weichen Ayer / welche von erfarnen Medicis Oua serbilia genant werden / die pflegt man kaum recht warm werden lassen etc. Die aber war weich genossen werden / müssen der hitz des Feners ein wenig mehr empfangen / Die frischen weich gesotten Ayer die gehent schnell hindurch / sanfftigen die reuhe der Kehl / darumb
etliche

etliche vermeinten ein helle Stim darvon zukommen/
wo sie rohe Ayer einsuppen / Doch pflegen solche ganz
weich gesotne Ayer wenig Nahrung zu geben / Die har-
ten Ayer sind ein grobe speiß / schwerlicher demung/ ge-
hend langsam durch / vnd geben ein vast dick grob Ge-
blüt/ Ayer im schmaltz nach vnser Teutschen manier/ist
ein schedliche vngesunde speiß/dann sie geben wenig na-
rung / vnd so man sie im Magen dewet / so riechen sie
vast starck vber sich/ geben ein schedlich gefaßt der Na-
rung/darumb die Welschen ein ander manier brauchē/
solche Ayer im schmaltz zu backen/ setzen ein zinen schüs-
sel auff ein glut pfannen/ thunt frische butter darein las-
sendts wol warm werden/schlahen dan die Ayer hinein/
Aber vnter allen manieren die Ayer zubereitten/ das sie
am aller gesündesten sein/wird von erfarnen Medicis ge-
setzet/das man siedende Wasser hab / vnd das Ay dar-
ein schlahe/vnd nit lenger sieden lasse / dann biß dz weiß
gerinne vnnnd der dotter weich bleib / solche Ayer pflegt
man auß dem Wasser inn ein frische zerlassne Butter zu
legen.

So wir aber dises orts alle manier der bereittung der
Ayer/vnd was von Ayeren/von richten/vnd mancher-
ley speisen zubereyt wird/nach Teutschem vñ Welschem
gebrauch erzelen wolte/ würde ein sonderlich Kochbüch
lin geben / wöllen aber vmb kürze willen vnterlassen/
vnnnd ann einem andren bequemerem ort weydeuffiger
handlen/Doch merck das allein / die Hüner Ayer taug-
lich sind zu der Speiß/wiewol die erfarnen Medici auch
die Ayer der Kephüner / Haselhüner / inn sonderheyt
hoch loben/vnd vast krefftig achten / Gensß vnd Enten
Ayer seindt gätz vnfreundlicher niessung/werden allein
vom Gemeinem man etwan genossen/geben ein vast bö-
se Nahrung / Die Alten haben die Ayer mit Butter vnd
Honig gessen etc.

PAguri Krebsß / Werden auch Canceri genant / Bey
vns Teutschen ein vast gemeine / doch zimlich herli-
che speise/ sind denselbigen vast gesundt/ vnd diensflich/
welche schedigung vnd Vlceration der Lungen haben/
sollen aber der Blasen schedlich sein etc.

PAnis Brodt / Des Brodts wird so mancherley Art/
vnd vilfaltiger weiß vnnd manier/ allenthalben ge-
backen / das nit wol möglich solchen vilfaltigen vnter-
scheid/inn gewisse Reglen zu fassen/doch ist inn kürzer
summa zu mercken/das die narung oder fürung/welche
wir von Brodt entpfahē/viererley gestalt vnterschieden
wird/ als fur das erst der materij halb/ zum andren der
bereitung im Tayg/zum dritten des backens halb/vnd
zum vierden/nach dem vnd man es braucht etc.

Das best vnd gesündest Brodt ist / so man von dem
aller hartesten vnd vollkommeften Korn/ so man kaum
vnter den Zänen zerbeyssen kan/doch hernach lind vnd
melbig ist backet/ Das grob ruckten Brodt/oder gemein
speiß Brodt/ gibt ringe narung/ gehet snel hindurch/
von wegen der Kleyen/ welche ein abstringirende krafft
haben/ vnnd die darin zum austreiben der vberflüssig-
keyt des stulgangs anreizen.

Aber das gar rein subtil Semmel Brodt/ gehet nit al
so snel durch/vñ ist aber zwischē dem aller gröbsten vñ
aller subtilsten Brod/ein solcher vnzelicher vnterscheid/
das nit möglich solches inn kurze/wie vnser furgeno-
mene ordnung erfordert/ zu fassen / doch wollen wir zu
sonderlicher auffmerckung/ etliche kurze Reglen/die hie
rin wol warzunehmen/ zu sonderlicher nutzbarkeyt erze-
len.

Vnd ist fur das erst zu mercken/ye reiner vnd subtiler
das Brodt/ye besser vnd gesünder geblüt vnd narung es
gibt/

gibt/vnd ye baß es auch füret/So dann das Brod wol
angefewert oder geheffet ist/ vnnnd im Teig vast wol ge-
wirckt/vnd erarbeyt/vnd rechter massen gebacken/das
ist am leichtdewigsten/vnd gesündesten etc. Das warm
Brodt wie es auß dem Ofen kömpt gessen / gehet lang-
sam durch/gibt vil narung/ vnd füret wol/ ist aber vast
schwerlicher dewung etc.

PAuonum caro Pfawen fleisch / Es ist des menschen
schlechterhafftigkeit also groß vnd mechtig / das den
aller schönsten Vogel den Pfawen/wie herlich vñ schön
er von Federen/wunderbarlicher schöne gezirt ist/ solche
schöne nit helfen oder erretten mag/sonder er muß auch
inn die Ruchen/vñ den reichen mit grossen gepreng fur
getragen werde/so sein fleisch doch nichts/ dan harte fa-
sen vnd zaseren/nichts dan vberflüssigkeit gebiert/ vnd
gantz vnderwig ist / Doch sol der Pfaw ein sonderliche/
Erefftige eigenschafft haben/nemlichen so man in sendet/
vnd die brü den selbigen gibt/die mit dem scharpfen wee
anzündung vñ schmerzen des ryppfellins beladen sind/
inn sonderheyt wo solche brü vast feist etc.

PAstinacæ Gelb vnd rot Mören / Dises süß vnd wol
geschmückt Würzlin/ hat bey den Gelerten bißher/
gar vil zant vnd widerwertigkeit erweckt/ dan dieweil
vnser Kreutter Meyster / nur auß den Buchern vnnnd
Brieffen der Kauffleuth/ welche inen frembde Kreutter
berschicken/ ire Kreutter Kunst zu studiren/ dann im
Weld vnd Wildnussen/ nit allein Teutschlands/sonder
auch andrer frembder Nationen / ist sich nit zuuerwun-
dren/das sie auch die gelben Ruben nit wissen zu kennē/
aber von disem vnd andrem mag der gut hertzig Leser/
vnser new Reformation der Apoteken/Annotations in
Diosco-

Dioscoridem & Theophrastim, Symphoniam omnium qui
de Herbis uera & cum ratione scripserunt, vnd vil ander
dergleichen schrifft arbeyten/ so wir gemeinen nutz zu ehe
ren vnd wolfart/haben publiciert, vnd nach teglich wi
der alle Machmationes, vnserer tadler inn Truck verord
nen etc. Dise süß Rüblin sind Frawen ein anmüttig Kost/
vnd lieplich Confect, wo man sie einmachet/ werden von
erfahren Medicis gesagt warmer Natur / im andren
Grad/ aber feucht im ersten/ vnd ob dise Rüblin gleich
wol ein wenig lieblicher sind / dann die weissen Rüben/
so geben sie doch nit also vil narung/ führen nit also wol/
haben aber die krafft/ das sie den Harn fürdren/ zu vns
kuschheyt vñ fleischlicher begirdt bewegen/ plehen etwz
vnd sind schwerlicher derung / inn sonderheyt wo man
sie/ wie im Niderlandt der brauch rohe isset/ aber mit gu
ter fleisch brü od mit butter bereyt/ pflegen sie den bauch
zusänfftigen/ den Weibern ire gebürliche reinigung zu
fürderen/ geben nit zu gar vast gesunde Geblüt/ machen
den natürlichen Samen flüssig/ vnd wesserig/ vnd erht
zigen die Nieren. Hie ist aber inn sonderheyt zu mer
cken/ das diser Mören oder Rüblin/ zweyerley art sind/
Die erst daruon wir gehandelt haben / ist schöner gelber
farb / aber die ander manier so im Teutschlandt allein/
vñ Straßburg am gemeinsten/ vñ bekandlichsten/ die
ist ganz blutrot/ vñ hat sich hie aber mals/ beyden kreut
ter Meystern ein irthumb erhaben/ welche dise rotte ru
ben/ mit den rotten Beren oder Mangolt wurzlen con
fundiert haben. Vñ werden aber die rotten Mören von
erfahren Medicis gesünder vnnd besser geachtet / dann
die gelben/ welche auch vil gemeiner/ dann diser zeyt die
rotten Mören allein zum einmachen/ vnd nit zu der spei
se gebraucht werden/ vnd ist aber die versach/ das sie sol
len nützlicher vnd besser sein / das sie sampt irer werme
auch

auch ein mechtige scherpfte haben / darmit sie den zehen groben schleim abledigen etc. Wie aber solche Rüblin ein gemacht werden / vnd nützlich gebraucht / such im andren theyl von bereitung aller Confect / vnd Apotectischer Compositionen oder Mixturen etc.

Phasiani Fasan / Der Phasian ist ein edel wildpredt / dann er vast leichedewig / gute Narung gibt / vnd ein frisch gut gesundt Geblüt / Doch so wir ye die Warheyt bekennen wollen / so mag ein guter feister Capon einem yeden Fasan / inn disem allen gleichen / vnd bey weilen wo sie gleichlich bereyt werden / vbertreffen.

Berdicum caro Rephüner / Die Veldhüner vñ Rephüner / sind etwas gemeiner dann der Phasan / bey vns Teutschen ein seer leichedewige speiß / die gute gesunde Narung gibt / doch wollen die alten erfarnen Medici / das man sie nit also schnell / als sie abgewürgt sind niesen sol / sonder den andren tag / vnd wo es die zeyt leiden mag hiez halben / den dritten tag / inn welchem fall inen fur war trewlich geuolgt wird / dann bey vns Teutschen der brauch / das man solche Rephüner / desgleichen ander Wildpredt nit ehe zu tisch tregt / es sey dan halb faul vnd stincke / Rephüner fleisch sol den Bauch stopffen / vñ gibt ein subtil dün geblüt / vnd wo dick grob geblüt vorhanden erdünnert es dasselbig / dises Wildpredt / dienet den schwachen vnd blöden Menschen / die on vnderlaß mit krankheit vberfallen werden / wenig essen mögen / vnd ein feuchten Magen haben / Die Leber von Rephüneren vnd Haselhüneren / ist ein nützliche behülffliche speiß / fur den schweren erschrockliche gebrechen der fallende Sucht / die Gallen inn die Augen gethan / macht hell / klar / vnd lauter Augen scherpfet das Gesicht etc.

Persica Pfersich / Ob vnser Pfersich aus Persia kommen sein / vñ solcher giftiger art gewesen / wer auch wol zu disputiren / wil sich nit dafur ansehen lassen / aber vergleichung / 8 wörtlin bringt etwan schweren irthum / dise Frucht ist inn Teutschlanden vast gemein / vnd mag nüglich inn der speiß gebraucht werden / von dem eigentlichen Grad / in kelte vnd feuchte / zweiffen die erfarnen Medici / vnd nit vnbillich / dann solcher Frucht durch die pflanzung mancher gley art / derē etliche feuchter / etliche truckner Augenscheinlich gesehen werden etc.

Alle Geschlecht der Pfersich / geben ein flegmatische feuchte / werden schwerlichen gedewet / vñnd gar schnell im Magen corruptirt, oder zerstöret / darumb wo man der Pfersich zuvil frisset / volgt gemeiniglich ein feber / So haben sie auch ein sonderliche eigenschafft / das sie dem weissen gader schädlich sind etc.

So man aber die Pfersich mit rat niessen wil / das sie weniger schaden / sol man sie alle zeyt zum ersten / fur andrer speiß niessen / vnd ein gutentrunck krefftiga wolriechendts firnens Weins darüber thun / welcher trunck inen ire schädlichheyt zum theyl benimpt / die wol zeytigen nasen Pfersich die erweichen den Bauch / vnd sänfftigen in zum stulgang / aber die rohen vnd vnzeitigen Pfersich stopffen in / Es wird aber ein gemeine Regel gesetzt / dz man sich mit höchstem fleiß verhüten soll / das man kein Wasser auff die Pfersich trincke / Weiter zum beschluß / ist zu mercken / das der Safft des Pfersich baum laubs / vber die maß ein krefftige Argney ist / den Kindern fur die Würm eingeben / oder den Bauch vnd Nabel darmit wol gesalbet etc.

Pinei Nuclei Pineen Kernen / Ob dise frembde Kernlin / gleich wol mer in der Apoteccken / dan vber Tisch gebrencht

gebreuchlich/haben wir sie doch nit vberschreiten wolle/
dann sie bey denen so irer gesundtheyt pflegen/ inn vast
gemeinem brauch sind / Erstlich inn ein siedent Wasser
geschut/darin wol erschwellet/ dann inn kaltem Wasser
widerumb erwaschen/mit Zucker vnd Rosen wasser an-
gemacht/ gibt ein herliche krefftige richt. Dise Kernlin
sind warm im andren Grad/trucken im ersten/geben v-
ber die maß reilchiche Narung/vñ führen wol/ob sie glei-
chwol schwerer demung sind/ vnd groben safft oder feuch-
te geben/geberen aber doch gut löblich geblüt/sänfftig-
en/lindren/vnd miltieren alle reuhe der Wehen/ dienen
auch den schedigungen oder Vlceren der Blasen/vnd be-
nemen alle scherpffe/die sich im Magen vnd Nieren er-
hept/Vertreybt den alten husten/vnd alle gebrechen der
Lungen/ von Feuchte verursacht / so Lyster geben im
außwerffen/man mag sie auch mit Zucker bezogen oder
conficirt niessen/oder mit Honig/ oder gesotnem Most/
so meren sie den natürlichen Samen / vnd sind auch de-
nen vast nutz vñnd bequem/ die geneigt sind zum zytte-
ren vnd beben der Glider etc.

Piper Pfeffer/ Die Pfeffer körnlin sind ein gemeine
Wurz/ auch bey dem Baur man/ welche auch seine
Kost darmit weiß meisterlich anzubesseren / ist ein vast
hizig gewurz/ dann es hizig vnd trucken ist/ biß in den
dritten Grad / Plegt die vast groben zehen flegmati-
schen schleim ab zu tragen/ vnd ab zu ledigen/ zerteylet
auch alle wind vnd plehung im Leib/wie grob vnd vn-
geschlacht die seien/trucknet die feuchtigkeyt in der brust
vnd Lungen/ vnd allen Glidren des eingeweidts/ doch
sol er den Nieren schedlich sein etc.

Bira Byren/ Der Byren haben wir durch fleißige
Pflanzung vnserer Gärtner ein solche menig bekoma
men/

men/inn solchem vilfaltigem vnterscheidt/das jr natur/
vnd eigentschafft/ im kurtzen nit angezeigt werde mag/
allein dz man wisse/das solches obs rohe nit gessen sol/es
sey dann wol zeittig/Byren inn der Aschen gebraten/od
mit Butteren verdempfft/ geben ein liebliche kost/ dann
also verlieren sie alle ire schedlicheyt/ inn sonderheyt mit
Aniß vnd Fenchel samen besprengt etc.

So man der rauhen vnzeitigen Byren zunil frisset/
so geben sie gar bald das grünen vnd leibwee /die Colic
genant etc. Wolzeitige Muscateller Byren/ vbertref=
fen ires gewürzten edlen geschmacks halb alle Byren/
rohe oder eingemacht genossen/ nach disen zum brattē/
kochen / einlegen inn Wein / vnd dergleichen die Regel
Byren etc.

PIsces Visc/ Wo gleichwol wol der Visc allenthal
ben inn Teutsch/ nit also ein vnzalbarer vnterscheid
wer/ mancherley art/ manier/ vnd gattung/ so sind doch
die die sonderliche namen/ die ein yeder Visc inn yeder
Landtschafft bekômpt genugsame vrsach/ das man nit
von einem yeden inn sonderheyt schreiben kan/ darumb
wir es inn kürze alles inn einer summa begreiffen wölle
vnd setzen/ das alle Visc kalter vnd feuchter natur oder
Temperaments sein in gemein. Aber die sich in Steinen
vnd Felsen halten im Wasser/ sind vil gesünder vnd bes=
ser/ dann die andern/ dann sie sind leichtlicher derung/
geben ein gut gessaft der Nahrung/ vñ befeuchtigen zim=
lich/ dann sie sind nit hart von fleisch / Nach disen sind
die frischen Wehr visch / die auff dem hohen Wehr ge=
fangen werden/ die gesündesten vnd besten/ Aber die inn
faulen stillstenden Wasseren/ Graben sthen/ vnd Weihe=
ren/ sind nit gesundt.

Es haben die alten erfarnen Medici sonderlich gewis
se war:

se warzeichen gesetzet / darbey man erkennen inn yeder Landtart ein vnbeakanten Visch/ob er gesundt oder vn gesundt sey / nemlich das man war nemme/ das er kein hart/rauhe/ vnartig speiß fleisch hab/ sonder lindt/ wol vnd hart geschiept sey/nit schleimig oder glat/ so man in bereyt / das er nicht nach mür oder anderer vnreinig keyt rieche/ Sol auch nit zu feist sein/ vnd so er am lufft ligt nit bald corruptirt/ oder zerstöret werden/ vnd fur allen dingen am geschmack lieblich / darmit man nichts mit vbertrieß oder vnlust/vñ widerwillen niesse/welches inn Vischen in sonderheyt wol war zu nemen/ wo man schwere Kranckheyt vñ mancherley Süchte vermeiden wil/ sunst wo obgemelte zeichen an einem frembden vnbeakanten Visch gespürt werden/ mag man in sicher nies sen/dann solche Visch leichtlicher dewung sind/ vnd gut gesunde geblüt geben / wiewol alles geblüt so von Vischen geboren/wird vil reiner/ subtiler/ vnd dünner ist/ dann von fleisch Speisen. Die ist aber auch inn sonder heyt wol zu mercken/das die Visch denen am diensflich sten vnd bequemsten sind/die kein vbung haben/ sich kei ner arbeyt oder leiblicher exerutation gebrauchen / vnd denen so von schwerem leger/langwiriger Kranckheyt ge sundt auff kommen/So man in den Steten da vil was ser ist Vische niessen wil/ sol man fleißig acht haben/ dz die selbigen nit innerhalb an den selbigen orten gefan gen worden sein/dahin mancherley Secret ren außgang haben/oder sich Rot/vnflat/vnsauberkeyt hin versam let/dann solche Visch sind giftig vnd schedlich/ aber die inn reinen/saubern/fliessenden/ Wasserren iren gang ha ben/die geben gut Nahrung/vnd geblüt etc.

Die Visch sind denen am gesündesten/so Cholerischer Complexion oder Temperaments sind/das ist vil Gallen haben / aber die flegmatischer natur vnd Complexion

sind/werden daruon hart verletzet/dergleichen die selbigen auch/die schwache nach gelassne nerven haben/vnd lamb Glider / die sollē die visch vermeiden/fürnemlichen Winters zeýt etc.

Gesalzgen Vischwerck ist hitziger vnd truckner Complexion/ledigt ab die zehen schleim/in sonderheyt wo solche guts saffts sind / vnd nit gar verhartet vnd verdorret/dann das ganz dürr vnd trucken Vischwerck/aufgenommen den Kochen / aber fürnemlichen den stincken den grösten vngesunden Halbfisch / oder Plattis vnnnd Scholl/ solt ein yede fürsichtige Obrißkeit/auf den landen verbietten etc. Welche inn der Aderlasse gesalzgen Visch isset/der pflegt gern schebig vnd grindig/oder kreigig zu werden/

PVrcus Ein Schwein / Wie köttig die Saw ist/vnd wie vnstetig sie sich neret / so können auch Fürsten vnnnd Herren Ruchin/ doch nit das Spects geratten/wird von allen erfarnen Medicis gesetzet / guts leblichs Saffts der narung/vñ ganz leichtlicher dewung/doch vnstandt/das das Schwein jårig sey/dann als sie schreiben/sol dz Schweinē fleisch etwas vergleichung haben/mit dem Menschen fleisch/Darum wir auch lesen in Historien / vnnnd alten geschichten / das die selbigen so von großsem hunger / inn hefftiger thewörung oder mangel/ als inn besatzung der Stet/haben Menschen fleisch fressen müssen/das sie bekant/ dz es kein andren geschmack noch art/ dan das Schweinen fleisch/ daruon auch wir Teutschen etliche fabel vnd Meren sagen/Disem fleisch gibt man zu/das es mer Narung gibt/ dann alles was man sunst niessen/oder brauchen mag/von andrer kost. Es möchte aber einen wunder nemen/ aus was vrsach das Schweinen fleisch also wol füret/vnd treffliche gute
Nas

Nahrung gebe/ so es doch also ein vast vn sauber Thier/
von freßens vnd sauffens halben / also das es sich mit
andrer kost erneret/dann alles direct/ tod/ vnflätigkeit
vnd wust/vnd wie doch das Schwein solche vn sauber=
keyt verderwen vnd inn Blut/ fleisch/ vnnd solche feyste
verwandlen mag/ Aber die erfarnen Medici entscheiden
dise frag darmit/das sie achten das das Schwein/einer
solchen gantz rechtmessigen Complexion vnd Tempera=
ments sey/nemen ein Exempel bey den Menschen/dann
ein Mensch der rechtmessiger Complexion vn Tempera=
ments ist / auch frisch vnd gesund darbey / dem schaden
nit leichtlichen böse/ vngesunde/ schedliche Speiß/die ein
böse safft der Nahrung geben/Dann von der natur wird
dasselbig das schedlich ist/ inn ein gut safft verwandelt/
mit der zeyt / Eben solcher Gestalt halt es sich auch im
schlacht Vihe etc.

Welche aber ein feuchten Magen haben / die mögen
das Schweinen fleisch nit wol verderwen/sonder sie wer=
den innerlich verstopffet / von der schedlichen vberflüssi=
gen feuchten/vnd zehen Humoribus oder schleim/welch=
en solches fleischs/ wo es vngedewet bleibt / mit der zeyt
gebiert / vnd sich im Leyb samlet / Weiter dienet das
Schwein nit allein inn die Rücken/den Bauch zu erset=
tigen/sonder auch der Arzney / dan von dem Schwein
in 8 notturfst/mancherley Remedia daruō genomē wer=
dē mögen/welche wir doch den fleißigen vn fürsichtigen
Haus haltern/nit bergen wollen/ Vnd fur das erst/ wo
einer hart gangen het / also das im an fersen die Haut
hinweg wer/der bind von Schwein Lungen/ye ein stü=
cklin darüber/ es heylet / Schweins Leber ob sie gleich=
wol sunst inn der Speiß nützlich genossen wird/so hat sie
doch sonderliche krafft / wider vergiffter Thier schedi=
gung vnd biß/mit Wein eingenomen etc.

Die

Die Schweinin Fuß vnd Klölin / sind ein sonderliche gute berümpfte speiß/ bey vns Teutschen/ geben zimlich= en guten Gesafft/ werde den selbigen geben/ so von krankheyt auffkommen/ wenig essen mögen inn Sülzen eingemacht.

Auffgederte Gallen von einem Schwein / dienet fur die schmerzhaftten Fegwarzen / vnnnd Knorren oder Schründen im affter. Des Schweinen schmalz nutzbar keyt/ nit allein inn der Speiß vnd Arzney/ sonder auch inn mancherley Handtwercken/ zu beschreiben erfordert ein eigen Buch etc.

Die kleinen Specercklin / welche man also bey der Milch yffet/ sind gantz feuchter natur/ vnd voller vberflüssiger vnreinigkeyt/ keins guten nach leblichē gesaffts/ darumb man jr anders nit gebrauchen sol dann gebrat= ten/ Lung/ Leber/ Milz vñ Eingeweydt/ wol erschwellet / klein gehackt / mit gutem gesalgnen Spect/ Pfeffer vntermischt/ auch innerhalb mit Pfeffer wol beriben/ benimpt jm also gebratten alle schedlichheyt etc.

Das Schweinin wildpredt so es Winters zeytten feist ist/ wird es fur gesünder geachtet/ dan das zam Schweinin fleisch / dann das Wildpredt gibt nit also vil vberflüssiger unreiner feuchte/ oder also grobe zehe schleim etc.

Porrum Lauch / Der Lauch hat inn Frülings zeyt inn der Rüchen vil auß zu richten / ist hitziger vnnnd truckner Natur im ersten Grad/ treybt den Harn/ vnd gibt ein böß gesafft der Nahrung/ verderbt das Gesicht/ dann er macht dunckel Augen / wo man in wolt zuwil vnnnd vnmeßig brauchen/ wie etliche freßige Leuth pflegen/ die in rohe zu aller Kost fressen/ er erweckt des nachtes vnruhige fantastische treum/ vnnnd ist dem Wagen seer schedlich/ erhizigt den natürlichen Samen/ erwecket
aber

aber schmerzen vnnnd weethumb des Haupts / vnd schē-
digt vber die maß seer / Leber / Nieren vnd Blasen / die
Welschen siedē in inn Wasser / gießen die erste brü hin-
weg / ein ander dran / dann mit Essig / Salz / Baum öl /
eingemacht / vnd ein wenig Römischen Kümmel darauff
gestrewet / solche Speiß dienet wol denen / so ein kalten
Magen haben.

R Adiculæ Rettich / Den man auch gemeiniglich Ra-
phanum nennet / Ist bey vns Teutschen ein ganz
gemein / vñ fur allen andren Wurzlen die gebrauchlichst
Wurzel / hitzig im dritten Grad / trucken im andren / vñ
wil Galenus der namhaftig Gesicht Medicus / das die
Alten vor seinen zeytten / den Rettich noch vil mer / vnd
inn hefftigeren gebrauch gehabt haben / also das sie in
mit Essig vnd Salz pflegten inn nüchteren zu essen / wo
sie auff das Veldt zu der arbeyt hinauß giengen / des
morgens darmit den Bauch zu sänfftigen / vnd zum stul
gang zu bewegen / So wir aber den rettich vnd sein art
mit fleiß erwegen / ist er denen so irer gesundheyt pflegen
wollen / nützer vnd gesünder den selbigen zuuermeyden /
dann zu niessen / vilfältigen vnrads halb so er erwecken
mag / vmb kürze vnterlassen etc.

R Apa Rüß / Die Rüben füllen dem Handtwercks
man / vnd Bawers volck den Bauch / darumb wir
sie auch nit vnbillich vnter die Herrn kost setzen / welchen
die Rüßlin auch etwan wol schmecken / sind warmer vñ
feuchter natur im ersten Grad / geben zimliche narung /
bewegen den Harn / plehen seer / vndn vermehren den
manlichen Samen / vnd machen in wachsen / sänfftigen
vnd lindren Brust vnd Lungen / So man zuwil Rüben
inn der Speiß brauchen wolt / geberen sie grobe vnreine
h feuch-

feuchten/vnd verstopffen die Leber/ stopffen den bauch
nit/ vnd sänfftigen in auch nit / So man sie seudet vnd
inn Compost einmacht / mit Salz also ganz / den wol
erwaschen/ mit Essig vñ Salz gessen/ erwecket den lust
vnd Appetit zu der Speiß/vnd macht lustig zu essen etc.
Gesotten mit feistem Rindfleisch / oder mit Butter ge-
schmälz/ verlieren sie ire schedlicheyt/vnd werden ein lies-
bliche anmüttige Speiß etc.

SAcharon Zucker/ Der Zucker ist der Apotecken Fun-
dament/on welchen sie mit irem Kram/ nit wol be-
stehn möcht/wiewol auch der kost/ des Zuckers also milt
ist / das er sein zu keiner richt gar nahe vergessen kann/
dann wo es verderbt/ faul / sawer/ oder stinckent/ muß
der Zucker der besserer sein / vnd mit seiner lieblichen süß-
sigkeyt/ allen feel vñnd mangel verhelen/vnd vndertru-
cken / ist warmer vñnd feuchter Complexion im ersten
Grad/reinigt vnd ist gar nahe der art/wie der Honig/
allein hat er die tugent/ das er nit durst erwecket/wie der
Honig/so jucket vnd brennet er auch nit also im Magē/
der feist Zucker sänfftigt den bauch/ dienet aber furnen-
lichen der Brust vnd Lungen/ Nieren vnd Blasen/ die
hitziger Complexion sind/ sollen den Zucker vermeiden/
dann er verwandelt sich in jnen vast leichtlichen in Cho-
lerische feuchte etc. Zucker auff ein Rolfewerlin geworf-
fen/vñ den rauch entpfangen/stillet den hefftigen schnu-
pfen oder strachen vnd trucknet die fluß etc.

SALZ / Ist furwar die aller nützlichst/ notwen-
digst/ best vnd gebreuchlichst Würtz / die wir haben
mögen / welcher weder der Bawer noch der Edelman/
groß oder klein Hans entraten mag/inn allen Speisen
so wir niessen/dann woher hat die kost iren anreizenden
ge²

geschmack/dan vom Salz/ welches hizig ist im andren
Grad/vnd trucken im dritten/hat ein zimliche doch mes-
sige atringirende krafft / ist denen vast nuz vnd gut/die
flegmatischer Complexion oder Temperaments sindt/
treibt den Bauch/ vnd macht den Leib mager/ reinigt
oder mundificirt/bewegt auch den Lust vnd Appetit zu
der Speiß etc.

Wer sich aber des Salzes zu vnmassig braucht / dem
verderret/ertrucknet/vnd verbrennet es das geblüt/ver-
derbt mit der weil das Gesicht/machts ganz finster vnd
dunkel/ verzeret auch den natürlichen Samen/vnd er-
wecket vber den ganzen leib/ein scharpff jucken/ schau-
den vnd beissen / vnd ist allen inneren Glydren schade/
vnd verleglichen/verzeret doch im Magen alle feuchte/
vnd vberflüssige wesserige feuchte etc.

Die faulen Zän vnd Biller darmit wol beriben/ truck-
net sie vast wol / vnd stercket die Zän vnd Zänfleisch etc.

S Inapi Senff / Wo gleichwol der Senff einem nach/
Also sawer inn die Nasen reucht/ so können wir sein
doch nit entratten/das er vns lustig vnnd wol essig ma-
che/ist vast hiziger vn truckner natur / darumb sol man
nit zu tieff an boden greiffen / als wolt man ihn wie ein
Prey mit Löfflen fressen/ Der Senff hat seine Tugent
vnd Krafft / das er die wesserigen feuchten/ im Haupte
vnd Magen verzere etc. So ist der Senff auch ein nütz-
liche hülff/inn denen gebrechen des Niltzes/ welche von
feuchte vnnd windigen plehen verursacht werden/wird
auch gelobt im viertägigen feber / so von verbrantter
flegmatischer feuchte verursacht werden/geßgleichen im
Podagram vnnd Zyperle/ von flegmatischer feuchte
verursacht.

Senff ist aber den Augen vnd Gesicht vast schade/vn

inn sonderheyt dem hitzigen Haupt vnd Leber / dienet
aber vnd ist behülfflich der Leber / vnd inn sonderheyt
wo man grobe Speiß gessen hat etc.

VInum Wein/Es ist furwar der Wein ein wunder
barlicher Gast/der sich von niemandt/ weder von
Fürsten oder Herren / noch den Gemeinen man zemen
lasset/ wo er vberhandt nimpt/ als wir dan mancherley
treffrige wirckung sehen/ die der Wein thut/ bey trunck-
nen vnd nüchteren Leuthen etc. So trincken aber et-
liche den Wein / seiner nutzbarkeyt halben / Ander das
Hertz damit frölich zu machen / Ander aber darumb/
das jnen also wol schmeckt/ aber die gröste Bursch/ trinckt
in diser versach halben aller.

Vnd achtet man aber den newen Wein gemeinlich
en gegen dem firnen/wo sie inn gleicher güte/dz der new
Wein warmer natur sey im ersten Grad / der firnen im
dritten/ aber von Temperament des Weins/ sind solche
scharpfe Disputation vnder den erfarnen Medicis / die
noch vnentscheiden im zweyfel stehn/ das wir solches di-
ses orts genglichen vberschreytten wollen/ doch merck dz
etliche den roten dicken Wein fur gesundt halten/ vermei-
nen er bedörffe vast geringer verwandlung / das er inn
gut gesunde Geblüt verwandelt werde / aber der weysß
dün Wein gibt wenig Narung/ So stopffen die trüben
Wein/ Milz vnd Leber/sampt den Nieren/ daher dan
die grossen Weinsuuffer ire Wassersucht vberkommen/
ob sie sich gleichwol verwundren/wie es die Wassersucht
heysen mög/bey solchem grausamen vngeschwundnem
Wein sauffen/wiewol auch solche Wein vnMESSiglich al-
so gesoffen/vil andre gebrechen mer verursachen/als fur
nemlichen/Sandt/Stein/vnd Griß inn Lenden/vnd
Blasen / So den aber inn sonderheyt gemein werden/

wo sie sich inn der jugent mit dem trincken vnneßigen/
vnd vngedürlichen vben.

Welcher aber Temperiter Complexion ist/vnd zu pfle-
gung seiner gesundtheyt/ein bequemen vnd im nützlich-
en vnnnd diensßlichen Wein erwelen wolt / der trincke ein-
zimlichen klaren schönen Wein/8 doch kein grosse Wein-
stercke hab/nit grob/sonder in der Substancz ganz dünn
sey/vnd subtil/ mit einer sewre die nicht wol zu mercken/
oder geringen subastringirenden krafft. Die flegmati-
scher Complexion sind / die trincken am nützlichsten den
firnen Wein/der doch nit grob sey/sonder eins lieblich-
en guten geruchs.

Vnd ist furwar der Wein ein edel/lieblich/gesundt/
kressig tranck/wo mans mit massen vnnnd mit der ver-
nunfft trincket/dann der Wein gibt dem Leib/nit allei-
ne Nahrung oder fürung/sonder fürdert auch die speiß/
das sie schnel hinab steigt/erwecket die innerliche hitz o-
der natürliche lebliche werme/stercket vnd vermeret sie/
vnd welcher in waiß rechmessig zu brauchen/dem kömpt
er an seinem ganzen Leib wol/ Doch ist das sein furne-
men Wirkung/das er die Speiß mit sich fürre an alle ort/
dahin sie aus getheylet oder distribuiert werden sol/auch
durch die aller reinsten engesten vnd subtilsten geng/wel-
che der Wein inn solchem falerhitzt/vnd ein gute vol-
kommenne derwung verschaffet. Das er auch den Harn
fürdert/ist ein vrsach / das er also viel schedlichen feu-
chten auß fürret. Es wird aber die Tugent/Krafft vnd
Eigenschaft des Weins/ am aller meisten vnd füglich-
sten gemerckt/oder verstanden / inn denen Körperen/so
kalter vnd truckner Complexion sind/ als die Alten vnd
gemeiniglich die selbigen / welche yzund von schwerer
langwiriger tranckbeyt auffkommen.

Der new Wein erwecket vil plehung/wird schwerlich

gedewet/ gibt grobe feuchte oder saffider Nahrung/ vnd erwecket beschwernus vnd schmerzen des Haupts.

Es sollen sich aber furnemlichen dieselbigen fur wein hüten/ welche vast erhizigt oder vnmassig entzündet werden/ auch dieselbigen so etwas hitz eins febers fñlen/ dann wie Galenus schreibt/ wird alle ding leichtlich wie Junder von ferner flammen entzündet.

Der Wein erfrewet das traurig woslos Gemüt/ vnd stillt mancherley herglicher anligen/ vnd erdünnert das grob Geblüt/ der Melancholischen wanreizigen. So mā aber des Weins wolte zuuñ vnmassig trincken/ nach vnserem Teutschen brauch/ so schwecht/ frenckt/ bricht/ vnd zerstört er/ die rechte natürlich leiblich krafft/ vnter trückt die natürliche werme/ erstectet vnd erleschet sie/ ist ein anreizung des grossen Schlags oder Apoplexi/ vnd auch vnterweilen der schweren erschrecklichen plag/ der fallenden Sucht/ macht den ganzen Leib zitteren vnd beben/ vnd erlament alle Glyder/ daß dem ganzen leib/ seine krafft vnd macht dardurch benomen werden.

Aber fur allen dingen/ wird von vnmassigen trincken/ das Hirn/ Vernunft/ Sin vnd Gedechnus hefftig verletzet/ vñnd hart beschädigt/ inn allen iren wirckungen/ darumb gemeiniglich die grossen Wein sauffer/ dolle vnd dünanden Esel sind/ aller Sinn/ Witz vñnd Vernunft beraubt.

VVua Weinber/ Die schöne edle liebliche Frucht der Weintrauben/ welche vns das kostbarliche dranc des Weins bringen/ sind warmer vnd feuchter Complexion/ im ersten Grad/ wann sie zeyttig sind/ vnd geben mer Nahrung/ vñnd fñren baß dann andie frucht/ vnd geben kein böse Saft der Nahrung/ oder schedliche fruchte/ inn sonderheyt wo sie wol zeyttig sind/ Es wird aber

aber auß solchem Safft der Nahrung/vnd Geblüt/kein
starck/grob/sonder ein zart/lind fleisch. Die trauben so
man auffhenckt / vnd zeytlang verwelcken lasset / halter
man fur die gesündesten / dann sie in leichtleichten get
derwet werden/Die sauren trauben sind kalter natur/sto
pffen den Bauch / aber die süßen Trauben sind warmer
natur/vnd erweichen den Bauch/doch die weissen trau
ben mer dann die roten / vnd sind die Trauben alle der
Natur/das sie lustig machen zu der Speiß/vñ den ver
lorner Appetit erwecken/sollen auch als etliche erfarnen
Medici setzen /zu fleischlicher begird anreizung geben.
Weytter ist zu mercken / das ein yedes Körlin von vier
stückten zusammen geordnet ist / deren ein yedes sein son
derliche Natur vnd Eigenschafft hat / als fürs erst dz
Hentlin oder belcklin / das ist kalter vnd truckner Com
plexion/vnd wird vast langsam vnd schwerliche gedew
et/darumb man es nit hinab schlinden sol/ so man wein
trauben yßet/ Das ander stück ist das fleischig theyl im
Weinberlin/Das drit ist der dünn Safft/ Das viert die
Körnlin darin/ welche man sampt den Belcklin alle zeyt
hinweg thun sol/ vnd nit hinab schlinden / dann sie mö
gen nit gedewet werden etc.

Die Unzeittigen Trauben sind kalter natur/stopffen
den Bauch/dienen dem Magen vast wol/ dann sie dem
men die hitz der Gallen / oder scharpffen Cholerischen
feuchten / sind aber von seure wegen vnd herbe nicht zu
niessen/ Der Safft darvon den man Agrest nennet/er
wecket den verlornen Lust vñnd Appetit zu der Speiß/
vnd benimpt das vnwillen vnd erbrechen des Magens
etc.

Hie sol man aber zum beschluß mercken/das man die
Trauben/gleich wie von allen andren feuchten Speisen
gehalten werden sol/ in nüchteren oder fur allen andren
Speisen niessen sol etc.

Vue

VVe passa Rosin/ Die Rosin oder Wertreybel vnd
Zybeln / mögen vnseren Himmel nit vertragen/
Eelte vnd vngewitter halben/ darumb man sie aus frem
den Landen zu vns brenget / sind hitziger dann andere
Trauben/vnd ye feister sie sind/ ye besser vnd süßer/ des=
gleichen die so die zartesten Belcklin oder Heutlin habē/
werden fur den andren gelobt/ dann sie mer narung ge=
ben vnd reichlicher führen/ sind auch inn sonderheyt fur=
derlich der dewung. Die Rosin oder Wertreybel sind
dem Magen vast gut / bekömen auch vber die maß wol
der Lungen/vnd Brust/ stercken Leber vnd Miltz/ So
man sie mit den inneren Kernlin yffet/ so dienen sie allen
Glydren des eingeweydts / wiewol am besten das man
solche Kernlin nit hinab schlinde etc.

XYlocerata Sanct Johans brodt / Diser frembden
frucht/ welche auch vber Mer her zu vns gebracht
wird/ doch inn vast geringem brauch haben/ nur allein
der vrsachen halb gedenccken wollen/ das der brauch/ dz
man bey vns Teutschen/ den Kindrē diser frucht gar vil
gibt/dieweyl sie wenig kostet/vnd der süßigkeyt halb den
Kindren vast anmüttig ist / aber doch wenig nütz / also
das Galenus schreibt vnnnd wünschet / das man solcher
Frucht nit brechte zu Landt daher auß Martisan/ dan
sie schedliche böse feuchte oder Safft der Narung gibt/
vnd schwerlichen gedewet wird/ stopffet auch hefftig den
Bauch/vñ allen Bauch fluß/ od durchbruch des Leibs/
darum̃ dise frucht diser zeyt/nützlicher inn der Arzney/
dann also inn der Speiß gebraucht wird.

ZInziber Ingwer / Ist ein gemein vast gebreuchs
lich Gewürz / darmit gar mancherley kost ange=
macht vnd vberstrewet wird / wiewol man in auch pflē=
get

get eingemacht oder angebeyt zu niessen / ist hitziger natur im dritten Grad / vnnnd feucht im andren Grad / Er ist vast krefftig die speiß zu dauen / erwecket den lust fleischlicher begirdt / Zertheylet alle windige plest vnd plehung / trucknet die feuchten Augen / vnd verzeret die feuchte darin / daruon das Gesicht scharpff vnd klar wird / Verzeret auch alle feuchtigkeyt des Magens / vnd der Lebrin / desgleichen die zehen groben Schleim etc.

Zythus Byer / Mit diesem kostbarlichen heilsamen Tranck / sich Summers zeyt nach Teutschem gebrauch zu külen / wollen wir diesen besondren vnderchiednen theyl / vnser Corpus der Medicin / enden vnnnd beschliessen. Vnd ist das einfach simpel Byer kalter Natur / aber das doppel Byer hitziger Natur / Vnd wollen alle erfarnen Medici das Byer nicht gesund sey / sonder böse feuchte oder safft der Narung gebe / den Nerven oder weissem Geäder ganz schedlich / vnnnd solche scharpff Hauptwee erwecken sol.

Etliche aber wollen / das Byer krefftigen widerstand thue / der erschrocklichen Plag der fallenden Sucht / der Gallen denselbigen nutz vnd gut sey / welche zu diesen gebrechen geneigt.

Das Byer demet auch die Trunckenheyt vom Wein / Derhalben sich die vollen Brüder / des Abends mit Byer pflügen ab zukülen.

Das Byer mildert auch die scherpffe des Geblüts.

Vnd ist dz Byer furwar / ein gesundt nüglich Tranck denselbigen / welche hitziger Complexion sind / desgleichen inn grosser hitz vnd hefftigem durst / Dann das Byer leschet den Durst gewaltiglichen / Erwecket lust zu der Speiß / treybt den Bauch / vnd furdert den Harn.

J Aber

Aber welche ein kalten feuchten Magen/kalter feuchter Complexion sind/ denselbigen ist das Byer vast schädlich vnd zu wider etc.

Endt kurzer vnterrichtung/ der Natur/
Eygenschafft / Schadt vnnnd Nutzbarkeyt/
Auch rechten Gebrauch vnd bereytung/
der furnembsten stück/ derren wir vns
täglich inn Speysß vnd Trandß
gebrauchen etc.

Wie man sich zu yeder zeyt zu Wasser vñ
Landt/ inn reysen vnd wandren / welcher gestaldt oder
manier dasselbig beschehen mag / halten vñnd regieren
soll/ mancherley sorglichen zufellen vnd krankheyt-
ten/ so dann den Wandrenden auß vilfaltigen
vrsachen halben / leichtlichen begegnen
mögen/ zu furkommen/ oder zu ver-
hütten/ vnd auch mit zeytlichem
Radt zu wenden
etc.

Als wir bißher günstiger Le-
ser von ordenlicher haltung/ inn Speiß/
Tranck/ vnd allen denen dingen/ welch-
er wir vns zu stettem auffenthalt/ on vñ-
derlaß gebrauchen vnd geleben müssen/
geschriben vñnd geordnet haben / ist den mereren theyl
denselbigen zu pflegung ierer Gesundtheyt/ also mit fleyß
verzeichnet worden/ die sich einheimisch halten/ ire Ge-
schafft/ Gewerb vnd Handthirung zu treyben/ Dieweyl
es sich aber vilfaltiger vrsach halb begeben mag / nach
mancherley erfürdung/ der gelegenheyt eins yeden/ das
man etwan reysen vnd wandren muß/ zu Wasser/ vber
Landt/ oder auff dem Meer/ Vnd aber in solchem fall/
nemlichen/ so man inn der Frembde ist / inn sonderheyt
hoch vnd groß von nöten / sich auffß höchst zuuerscho-
nen/ vñ möglichsten fleiß anzuwenden/ bey gesundtheyt
zu bleiben/ vnd den vilfaltigen / schweren / meidenden/
oder sorglichen zufallen zu furkommen. Haben wir den
Reisendenden/ vnd Wandrenden/ welcher gestaldt deß-
selbig beschehen mag/ inn kurze ein sonderliche ordnung

setzen vnd furschreiben wollen/inn etliche furneme pun-
cten oder Reglen gesetzet.

Vnnd ist dieses die erst Regel / Das man Summers
zeytinn grosser hitz / so es vast gebreuchlich ist zu wan-
dren/nit lenger auff der Straß sey/es sey zu Fuß/Roß/
Wagen oder Karren/ dann von dem das der Tag an-
bricht auff iij. Stundt / als dann mag man ruhen / die
Hitz vbergehen lassen/ sich zimlichen Speisen mit weni-
ger Kost/die weder versalzen noch gewürzt/ oder sonst
scharpff oder mit scharpffen dingen angemacht sey/ son-
der man erwele vnder andren Speisen/ ein leichtderwige
Kost/die gute Nahrung geb/ vnd wol füre/etwas zu kü-
le geneigt/vnd sind inn disem fall/ die gesotnen Speisen
bequemer/ dann die gebratnen/ vnd wo es inn der zeyt
wer/ vnd man es haben möcht/ wer gut vnd nütlichen
solche Speisen/ mit swaren Salsen/ Essig/ Agrest, vnd
dergleichen zu niessen. Doch welcher ein kalten vnde-
wigen Wagen het/ der mag mit ein sonderlich gewürtz
(darzu inn allen Apotecken verordnet/ Species Barthol-
di genant)füren/ ein Wein daran giessen / vnd also fur
ein Salsen brauchen etc.

Weytter ist ein vast nütliche Regel / wo man es ha-
ben kan/ das man abends inn der Herberge/ die Füße
vnd Schenckel wol wasche/weldxer gestaldt man wand-
le etc.

Wo es sich auch begeb/ wie gemeiniglich geschicht/
das einer vast hefftigen Durst bekeme auff der Straß-
sen/sol er sich mit höchstem fleiß bewaren/das er auff ein
mal keinen grossen trunck thue / sonder mit langsamen
vnnd vast kleinen trüncklin / vnderstande den Durst zu
leschen.

Man sol auch so vil möglichen ist/auff der Strassen alle
starck/ geschweblete/ grobe / vnfreundliche Wein ver-
meiden

meiden/ vnnnd geringen liecht klaren sirnen Wein erwe-
len/ welche man doch nit vngewessert trincken sol/ wo es
auch gar hixige zeyt wer/ möcht einer nützlichen dise kü-
lende Latwerg mit sich führen/ vnd vnterweilen brauch-
en/ Nemlichen der schwarzen sawrer Weyrel/ oder A-
morallen Latwerg / die mit Zucker vnd keinem Honig
gemacht sey/ Violon Zucker/ Rosen Zucker/ yedes gleich
vil vntereinander gemischt / Vnnnd wo es aber zu hart
wer/ sol man es anfrischen mit ein wenig Granatin öp-
fel safft/ oder sawer Pomerangen vñ Limonen safft etc.

Weytter begibt es sich auch / das etwan nicht allein
vom gehen / sonder auch vom reyten vnd faren / auß
hefftiger erhizigung vnnnd entzündung / die Haut serig
vnd frat wird/ mit keinen geringen schmerzen vnd wees-
thumb/ inn solchem fall/ sol man dises volgents Sälblin
brauchen/ das magstu dir also bereitten lassen/ Man nē-
me Quitten öl/ Rosen öl vñ Wirtillen öl / die mag man
inn Rosen wasser wol erwaschen / dann neme man ye-
des ein Lot / des erweichten Gummi dragant/ inn Ro-
sen wasser ein halb Lot/ Amidum oder Krafftmel/ rot-
ten Armenischen Bolus/ rein gepüluert Gal öpfel/ yedes
ein Scrupel/ das ist ein drittheyl eins Quintlins/ Cam-
phor ein Gersten kölin schwer/ mit ein wenig weiß wax/
bereyt man ein Sälblin daruon etc.

Welcher sich auch fur disem gebrechen besorgt/ als die
so weder des reittens/ gehents oder farens/ sonderlichen
gewont sind / die mügen sich daheim mit solchem Sälb-
lin versehen/ vnd solche ort des Abends darmit wol sal-
ben / darmit mögen sie den obgemelten Gebrechen fur-
kommen etc.

Solches sind inn kürze die furnembsten Reglen/ die
ein yeder inn reisen vnd wandren/ leichtlichen/ doch mit
grossen nütz haben mag/ oberlandt zu reisen/ Aber auff

grossen Wasseren/ vnd furnemlichen auff der See/ vnd hohen Meer/ bedarffes gar vil einer andren höchlichen vnd fleißigeren auffmerckung/ dann der schedlichen zufel vnd sorglichen Accidentien vber die maß vil sind/ welchen man gar fürsichtiglichen/ vnd mit gutem rath fürsommen muß/ wo man das Leben erretten wil etc.

Nid ist das erst Accidens oder schedlich zufall/ so denen begegnet/ so zu Wasser faren/ vnwillen vnnd vnlust des Wagens/ vnd etwan hefftige Würgen vnd Gebrechen etc.

Der ander schedlich Zufal/ ist durchbruch des Leibs.

Der drit Zufall Hauptwee.

Der vierd Zufall ist hefftiger vnmesziger Durst.

Der fünfft Zufall ist stettige vnruhe vnd wachen.

Der sezt Zufall ist schwacheyt des ganzen Leibs

Der siebendt Zufall ist abscheuen aller Speiß etc.

Nid fur das Erst/ dem ersten Zufall zu begegnet/ welcher sich gemeiniglich erhept auß hin vnd wider schwancken der Schiff/ vom tryb der Wasser Wellen/ oder etwan von furcht vnd schrecken/ als furnemlichen denen/ welche des Wassers vngewonet sind etc. Sol man nach der Speys dieselbig bey sich zubehalten/ ein gute löffel vol vberzogē Coriander mit zucker niessen/ od ein wenig Quitten latwergē/ die doch on Gewürtz bereyt sey. Doch wo man ein ferne Reiss thun wolt/ als man etwan pflegt/ nemlichen nach S. Jacob zu reysen/ oder das heylig Landt zu besuchen/ mag man sich mit disem Confect/ oder Latwergen/ anff die Straß versorgen/ welche man also mag bereitten lassen/ Man neme Quitten Latwergē/ ein halb Pfundt/ die on alle Specerey

Zerey bereyt sey/ klarer erlesener Mastix kömmlin ein quint
lin/ Wirtillen bärlein/ Ammeij Samen/preparirten Co
riander, alle rein gepüluert/yedes ij. Scrupel/ das ist ij.
Drittheyl eins Quindlins / dise Stück vermisch alle wol
durch einander / zu einer bequemen Latwergen / mit
dün gesotnem Quitten safft Minum genant angefrisch
tet / Dise Latwerg krefftig den Magen vber die maß
wol/vnd furkömpt dem vnwillen vnd vnlust des Ma
gens/ vnd weret dem oben auß brechen / mag auch da
heim gebrauchet werden/inn solchem fall etc.

Wo es sich aber begeb / das sich einer dermassen hart
würgete / vnnnd hefftig erbreche / das man sich besorgen
muß weitererer vñ heftigerer zufall/wie sich dan auff der
See / vñ Meer gemeiniglich den vnersarnen begibt/
welche nit mehr bey solchem schimpff gewesen / als dann
sol man von stundt an / Arm vnd Schenckel vast hart
binden/solcher gestaldt / das man auch etwas schmerz
en füle / Wo aber solches mittel wenig helfen wolt / als
dann ist ein gewisse hilff / das man ein Ventosen oder
sahrepf Kopff in mitte auff den Magen setze / oder man
Fleybe drey oder vier kurzer War kerglin/auff ein starck
Bappir/ zündt sie an/ legs auff den Magen/ vnd stürtz
den strumpfflingen / ein gemein Trinck Glas daruber/
wird der dunst vom verloschnen War kerglin/den Ma
gen krefftiglichen zusammen ziehen / vnd solches hefftig
vnwillen vnd erbrechen stillen etc.

Darmit man auch disem schedlichem Zufall furkom
men mög/wer nütlichen den Magen wol zusalben/mit
volgendem Sälblin / Welches du also bereitten magst/
Nim Mastix öl/ Wirtillen öl / yedes ein Lot / Quitten
öl ij. Lot / Amber / Bysam/ yedes ein Gersten kömmlin
schwer/ solche stück magstu mit ein wenig weiß War zu
sammen zerlassen/zu einem Sälblin bereyten/oder vol
gende

gende stück weiter darzu genommen / ein Wagen Pflaster daraus machen / welches man inn disem fall on vnderlaß mag ob sich tragen / Nim des aller besten vnverfelschten Gummi laudani / des warhafftigen Confect / Galliaë Muscataë, Paradis, oð Aloës holz / yedes ein quintlin / rein wolgeleutert spiegel Hartz zwey Lot / rotter edler durrer Rosen / preparirten Coriander, wildt Galgant wurzel yedes ein halb Quintlin / Negelin / Beymenten oder Krause balsam münz / yedes ein Quintlin / von disen stücken sol man nach Apotectischem gebrauch / als wir hernach inn besondrem theyl anzeygen werden / disses newen Corpus der Medicin / ein Pflaster bereitten mit rotem Zendel bezogen / vnd durchtropffet / vnd auff dem Wagen getragen. Wo aber der Gebrech also hefftig wer / das man noch ein stercker Pflaster brauchen müste / magstu dasselbig also bereyten / Nim rein geleutert Spiegel hartz anderthalb Lot / Schiff bech ein Lot / des schwarzen wolriechenden Gummi Laudani / der nit verfelscht oder mit frembder Materij vndermischet sey / Des warhafftigen vnnnd recht bereitten Confectis Galliaë Muscataë / yedes ein halb Lot / Geygen hartz anderthalb Quintlin / des hart gesotnen Schlehen saffts / des hart gesotnen frembden Saffts / von stehendem Buxbaum / weissen Weyrach / des Apotectischen Sandaraca, so man fur Wacholter Gummi haltet / yedes ein Quintlin / von disen stücken bereitte man wie ob gesagt / nach Apotectischem gebrauch / ein Wagen pflaster / vnd legs vber.

Nie sol aber der guthertzig Leser mercken / das wir solche Pflaster vnd Remedia / der vrsach desto fleißiger beschreiben / dieweyl sie nicht allein denselbigen / so auff dem Wasser schiffen oder seglen / sonder auch denen zu hauß / inn solchen felen vnd gebrechen / vast nuzlich vnd behülfflich sein mügen etc.

Inn disem Fall wird auch vast nützlich gebraucht/ der Syrop od Latwerg/ von Sawrauch oder Erbse-
 len Berlin/ desgleichen von den lieblichen fruchtlin S.
 Johans trenblin genant / oder Syrop von Granaten
 Spffel Safft bereidt / oder der Syrop von Essig vnnd
 Zucker bereidt / Dryzachara genant / oder der Syrop
 von Deymenten/ weich gesotten Quitten safft/ Miua ci-
 stoniorum genant/ Solcher Syrop oder Safft/ sol er ye
 morgens nüchteren brauchen / sich auch darbey neben
 halten inn Speys / das er allein leichtdewige Speys
 brauch/ die sol man auch mit Essig/ oder das vil nützer
 vnd besser mit Agrest oder sarwer Bomerangen vnd Li-
 monen safft anmachen / dann solches nicht allein vast
 lieblich / sonder auch krefftig / das hefftig Unwillen zu
 stillen etc.

Nach der Speys mag man inn disem Fall/ nützlich-
 en brauchen Coriander mit Zucker bezogen. Haselnuß
 mit Zucker bezogen/ eingemachte Quitten/ eingemachte
 Muscateller Byrlin / eingemachte Mirabolani Rebu-
 li/ vnnd dergleichen stück / so den Magen stercken vnnd
 betrefftigen etc.

Dem andren schedlichen Zufall/ welcher gemeinig-
 lichen denselbigen begegnet / so auff dem Wasser
 schiffen oder seglen/ ist Bauchfluß/ oder durchbruch des
 Leibs/ Inn welchem Zufall alle oberzelte stück / die wir
 verordnet haben/ den Magen zu stercken/ vnd das Un-
 willen vnd oben außbrechen zustillen/ vnd miltieren/ vast
 nütlichen gebraucht werden mag. Aber inn sonderheyt
 wie inn disem Zufall/ nutz vnd gut/ das man den vnder-
 sten Bauch / mit disem volgendem Salblin wol salbet/
R das

Das sol man also bereiden/ Man nem Rosen öl/ Hir-
tillen öl / yedes zwey Lot / der Rüglin oder trochiscen/
inn der Apotecken Despodio genant/ roten Armenisch-
en Bolus/ Granaten öpfel blüet / yedes ein halb Lot/
die durren trucknen stück/ sol man zu reinem Puluer stof-
fen/ dann mit den Olen vermischen/ vnd ein wenig weiß
Wax darunder zerlassen / das es ein dünnes Sälblin-
geb/ rechter bequemer form etc.

Inn diesem Fall setzet man auch vast nuzlichen ein-
schrepff Kopff an / auff die Nacht vnter dem Nabel/
So mag man jm auch nuzlich eingeben/ dises volgents
trencklin/ welches man also bereiten sol/ Nim der Lat-
wergen von weißsem Weirach bereidet drey quintlin/
des flüssigen Quitten safftes Wuua genant/ ein Lot/ dick
roten rauhen Wein iij. Lot/ vermisch zu einem trenck-
lin/ vnd gibs jm inn nüchteren des Morgens früe so der
Tag anbricht/ ein wenig lew warm etc.

Dem Zufall des Hauptwees/ mag man mit disem
volgendem Trencklin widerstandt thun / man be-
reydts also/ Nim des Syrops von magsamen ij. Lot/
Dyzachara iij. Quintlin/ breyt Wegerich Wasser vier
Lot / vermisch zu einem zimlichen Trencklin. Das
Haupt mag man auch salben vnd bestreychen/ mit Ro-
sen öl vnd Seeblumen öl etc.

Der viert schedlich Zufall / nemlichen der hefftig
Durst / wird hinweg genommen oder vertrieben/
mit den oberzeten Syropen/ Confect/ Latwergen vnd
Trin

Trincklin / zu bekräftigung des Magens verordnet /
aber diser Tranck ist inn sonderheyt nutz krefftig / vnnnd
gut ein yeden Durst gewaltiglichen zu leschen / bereidt in
also / Nim Seeblumen Syrop ein Lot / des Syrops
von dem sawren Citrinaten safft zwey Lot / darunder
vermisch des gedistelierten Safft / oder Wassers / von
Sawrampfer kraut so vil du wilt / vnd gibs im zu trin-
cken / als ein Julep / Oder nim des Syrops / von den sa-
ren Lymonen iij. Lot / vnd vermisch darunder ein gut
friesch Brun wasser etc.

DAs hefftig stettig vnMESSig / oder vnnatürlich wach-
en / mag benommen werden mit dem Magamen
Syrop / der vast krefftig ist inn disem fall / So mach
auch des Abends die Fuß waschet / inn Wasser darinn
Camillen / vnnnd ander bequeme Kreutter gesotten / ist
auch ein grosse vnd sonderliche krefftige fürdermus zum
Schlaff etc.

DEn sechsten Zufall hinweg zunemen / nemlichen /
Schwachheyt vnnnd Blödigkeyt des Leibs / vnnnd
Leiblicher krafft / beschicht durch gute Hüner bülin / gns-
ten lieblichen wolriechenden krefftigen Wein / Capo-
nen wasser / mit gutem Gewürz gedistilliert / Aber inn
sonderheyt ist nutz vnnnd gut / des Morgens inn nüchte-
ren einer Castanien groß / der Latwergen Regis ge-
nant einzunemen / oder der Confect Teflin Diamarga-
riton.

Aber den verlornen Lust vnd Appetit zu der Speiß
wider zu bringen/ vnd den Magen lustig zu mach
en zu der Speyß / mögen alle oberzelte/ fur ander
Zufall verordnete stück/ auch vast nützlich gebraucht wer
den/ inn sonderheyt dieselbigen stück/ welche den Magen
inn dem hefftigen vnwillen/ vnd oben außbrechen/ sterck
en vnd bekräftigen/ als furnemlichen/ sawer Pomeran
zen safft/ Quitten safft / Rosen wasser mit Bysam be
reydt/ Aqua rosata muscata genant / Maluasier Essig/
vnd dergleichen was ein lieblichen guten geroch hat.

Item man mag auch ein nützlich Pflaster bereyten/
auff den Magen zu legen / das mag man also bereidte/
Nim brosam von Brodt/ den erweich wol in halb Quit
ten safft/ vnnnd halb guten firnen Wein/ vnd ein wenig
Rosen Essigs / den zerstoß wol zu müß mit volgendem
Puluer/ Nim des sawren Sâmlins Saurach / Wirtil
sen berlin/ Ammey samen/ bereyden Coriander / Mu
scaten pluet/ Neglin/ dise stück alle oder derselbigen etli
che/ welche du haben magst/ zu reinem Puluer gestossen/
vnd mit der obgemelten erweichten Brosam wol incor
porirt zu einem Pflaster/ das streich man auff ein Bar
chet/ vnd legs auff den Magen etc.

Wes sich aber begeb / das einer nach solchem reyz
sen vnnnd wandren / wie gemeiniglich beschicht/
vast mager vnd dürr würde von Leib / auch schwach
vnd krafftloß / den sol man widerümb zu krefftten brin
gen vnd restituiren/ mit diser volgenden Latwergen/
welche man also bereyden sol / Man nem das fleischig
von einem Caponen / vnd von einem Rephun/ die wol
gesotten seien/ zusammen ein halb Pfundt/ der Species &
Regis


Regis anderthalb Quintlin/ der Trochiscen oder Rüg-
lin von Violen ein halb Quintlin/ Amidum oder Krafft-
mel zwey Lot/ weissen Zucker ein Pfundt/ Pirnen Ker-
nen/ vormals inn Wasser wol erschweller.

Dise stück sollen alle krefftig vnnnd wol zerstoßen wer-
den / thu der form einer Latwergen darnon / mag der
Patient nemen ein guten Löffel vol / so oft ihn ge-
lüst / vnd ein guten trunck firmens wolriechen-
des weiß Weins drauff thun.

Endt sonderlicher vnderichtung/ wie sich
zu halten inn reysen vnnnd wandren/
zu Wasser vnd Landt.

F I N I S.





Mg. 11

COUNTWAY LIBRARY OF MEDICINE

RM
215
R98

